

अपने हाथनसों रचिमालै । पहिरावै नित देवकिलालै ॥  
 यहिविधि बस्यो कृष्ण अनुरागी । जियमें प्रेमभक्ति अनुरागी ॥  
 तहँ दक्षिण मथुरा इक नगरी । पूरित प्रजा अनूपमसिगरी ॥  
 दोहा—तहँ इक बल्लभदेवको, नाम भयो महिपाल ।

धर्मधुरंधर शास्त्ररत, किय सुधर्म जनपाल ॥ ३ ॥

राज्यकियो राजा बहुकाला । लहे प्रजा नहिं तनक कसाला ॥  
 एक समय अधरातहि माहीं । राजा कढ़्यो अकेल तहाँहीं ॥  
 बागन लग्यो रूप निज गोई । निरख्यो तहँ वैष्णव इक कोई  
 सोवतपथ महँ परमअभीता । तेजवंत हरिदास पुनीता ॥  
 राजा पूछ्यो ताहि जगाई । को तुम वसे कहाँते आई ॥  
 साधुजागि भूपति जियजानी । कह्यो विप्र लीजै मोहिं मानी ॥  
 हम मज्जनकरि सुरसरि माहीं । सेतुबंध रामेश्वर जाहीं ॥  
 तब राजा करि ताहि प्रणामा । बोल्यो वचन महामति धामा ॥  
 जामें मोर होइ कल्याणा । सोवैष्णव तुम करहु बखाना ॥  
 तबहिं साधु बोल्यो मुसकाई । हैकल्यानकि यही उपाई ॥  
 जैसे आठमास रोजगारी । करिमेहनत जोरत धनभारी ॥  
 चारिमास बैठे घरखावै । वर्षाकाल अनत नहिं जावै ॥

दोहा—चारिपहर जिमि कामकरि, सुखसोवै जन रैन ।

युवा उमिरि उद्यमकरै, करै बुढ़ाई चैन ॥ ४ ॥

तैसहि मनुज जन्म जिय पाई । लेहि अवशि परलोक बनाई ॥  
 सौपचास इत वर्षन माहीं । करै जो पुण्यपापहूँकाहीं ॥  
 सो उत लाखन वर्षन भोगै । ऐसोहै सबशास्त्र नियोगै ॥  
 बनै जौनविधि नृप परलोका । सोई कर्म करौ तजिशोका ॥  
 सुनिराजा वैष्णवकी वानी । मनमें लियो यथार्थ जानी ॥  
 लौटि आपने घरको आयो । प्रात पुरोहितको बोलवायो ॥

कह्यो पुरोहित सों असवानी । केहिविधिवनै जन्म मतिखानी ॥  
तब अस कहे पुरोहित बाता । बोलहु सब पंडित अवदाता ॥  
तिनसों पूछेहु भूप उपाई । देहैं ते सबभांति बताई ॥  
तब राजा निज सभा मँझारी । गाड़यो खंभ एक अतिभारी ॥  
तामें मुद्रा धरि दशलाखा । सब पंडितन वचन असभाखा ॥  
कहै कोउ परलोक उपाई । सो दश लाखो मुद्रा पाई ॥

दोहा—सभा मध्य पंडित सकल, निज निज मति अनुसार ॥

कहन लगे बहु विधि वचन, परयो न एक विचार ॥  
विष्णुचित्त कह तब यदुराई । धन्विपुरी महँ कह्यो बुझाई ॥  
मथुरापुरी जाहु तुम ज्ञानी । राजहि लेउ दास मम जानी ॥  
भूषहि कह्यो ज्ञान उपदेशा । मिटै नाहिं संसार कलेशा ॥  
विष्णुचित्त सुनि प्रभुके वैना । मथुराको गमने भरि चैना ॥  
सभा मध्य प्रविशे जहँ राजा । विष्णुचित्त लखि उठी समाजा ॥  
राजा कियो ताहि परणामा । सादर सतकारयो मतिधामा ॥  
पूछ्यो नृप परलोक उपाई । विष्णुचित्त तब दियो बताई ॥  
भजहु भूप यदुपति पदकंजन । और उपाइ नहीं भव भंजन ॥  
राजा सत्य निदेश विचारी । पावत भयो मोद अति भारी ॥  
विष्णुचित्तको शिष्य भयो पुनि । दस लाखो मुद्रादिय प्रभु गुनि ॥  
उत्सव कियो नगर महँ राजा । भाइन भृत्यन जोरि समाजा ॥  
विष्णुचित्त कहँ नाग चढ़ाई । नगर प्रदक्षिण किय नरराई ॥

दोहा—अगणित पुरवासी चले, अवनीपतिके संग ॥

विष्णुचित्त आगे लसत, चढ़े तुंग मातंग ॥ ६ ॥

जय जय करत सकल पुरवासी । भये सकल हरि दरशन आसी ॥  
राजहु अस चाह्यो मनमार्हीं । केहि विधिलखौं यदूत्तम कार्हीं ॥  
विष्णुचित्त सब की मन आसा । जान्यो हरि प्रभाव हरिदासा ॥

कियो विनय प्रभुपहँ तेहि काला । प्रगटहु इत अब दीनदयाला ॥  
 प्रगटे विना जाति मम बाता । तुम तौ भक्त मनोरथदाता ॥  
 भक्त मनोरथ जानि सुरारी । प्रगटत भये प्रकाश प्रसारी ॥  
 गरुड़ सवार रमा सँग माहीं । अतुलित छवि नहिं वरणि सिराहीं ॥  
 सहस्रब पुरजन दर्शन पाये । सिंगरे विष्णुचित्त यश गाये ॥  
 राजाधन्य जन्म निज मान्यो । प्रेम विवश तनु भान भुलान्यो ॥  
 विष्णुचित्त लै कुसुम सुमाला । पहिरायो गल देवकिलाला ॥  
 बार बार प्रभु स्तुति गायो । भक्तवश्यता नाथ देखायो ॥  
 भये नाथ पुनि अंतर्द्वाना । जयरव भो चारिहू दिशाना ॥  
 दोहा—यहि विधि पुरजन सहित नृप, विष्णुचित्त शिरनाइ ॥  
 कियसानंद प्रवेश पुर, धनि निज भाग्य गनाई ॥ ७ ॥  
 विष्णुचित्त पुनि धनिपुरी, बसे आइ मतिवान ॥  
 जौन रही सम्पति सकल, अरप्यो श्रीभगवान ॥ ८ ॥  
 भक्त अधीन मुकुंद प्रभु, विष्णुचित्तके पास ॥  
 शालग्राम शिला सरिस, कीन्ह्यो प्रगट निवास ॥ ९ ॥

इति श्रीरामरसिकावल्यांकलियुगखंडेपंचमोऽध्यायः ॥ ५ ॥

### अथ अंगिराजकी कथा ॥

दोहा—भक्त अंगिरज नाम जेहि, महाभागवत सोइ ॥  
 तासु कथा वर्णन करौ, सुनहु संत मुदमोइ ॥ १ ॥  
 चौल महेश्वर दक्षिण देसा । कावेरी तट सुखद हमेसा ॥  
 मंडेगुटि तहँ नगर अनूपा । रह्यो तहाँकर धार्मिक भूपा ॥  
 विप्र सप्तदश वैदिक ज्ञानी । वसत रहे तहँ परम प्रमानी ॥  
 एक समय हरि कियो विचार । कलियुग महँ जन अघी अपारा ॥

मेरो दरशन कैसे पैहैं । कैसे कै भव पारहि जैहैं ॥  
 अस विचारि प्रभु प्रगट भये तहैं । रंगनाथ अस धरचो नाम कहैं ॥  
 नगर मंडगुटि रंगनगर ते । रह्यो न बहुत दूरिपुरवरते ॥  
 नगर मंडगुटि महैं इक काला । लिय अवतार कृष्ण वनमाला ॥  
 नाम तासु नारायण भयऊ । जन्महि ते ज्ञानी ह्वै गयऊ ॥  
 जातकर्म माता पितु कीन्है । पुनि व्रतबंध तासु करि दीन्है ॥  
 सो तजि भवन रंगपुर आयो । रंग चरण सेवन चित लायो ॥  
 रंगनाथ पूजन नित करहीं । भिक्षा मांगि उदर निज भरहीं ॥

दोहा—पर्णकुटी तृणकी रच्यो, तहैं वाटिका लगाइ ।

निज कर तुलसी फूल लै, अरपै माल बनाइ ॥ १ ॥

निज हाथनसों वृक्ष लगावै । निज हाथनसों तोहैं जलनावै ॥  
 तहैं यक निचुलापुरी विशाला । तहैं को रह्यो जौन महिपाला ॥  
 ताके रहीं वारतिय दोई । रूपवती रंभा छवि खोई ॥  
 तेहि नृप निकट काल बहु रहिकै ह्वै उदास कछु कारण लहिकै ॥  
 रंगनगर गवनी गणिकाते । लै सहचरी अनेक तहाँते ॥  
 रंगनगर संनिधि छदिपागा । रह्यो विप्र नारायण बागा ॥  
 महामनोहर लखि आरामा । करन लगी दोऊ विश्रामा ॥  
 शोचत रहे तरुन तेहिकाला । नारायण हरिदास विशाला ॥  
 दोऊ यदपि रहीं रंभासी । लखत परै गल मनसिज फांसी ॥  
 तदपि तिन्है नारायण दासा । कियो न तनक तनककी आसा ॥  
 तब छोटी भगिनी तेहि केरी । जेठी भगिनी कहैं अस टेरी ॥  
 यह नर धौ पषाणकर अहई । धौ विनजीव वाटिका रहई ॥

दोहा—याके सन्मुख हम दोऊ, बैठी रूप बनाय ।

हमपै तनक तकै नहीं, अचरज लगत महाय ॥ २ ॥

जो यहिको वश करु छबिवारी । तौ हम दासी होयँ तिहारी ॥



तब जेठी छोटी सों बोली । अपने उरकी आशयखोली ॥  
 यहि न करौं वश जो यहि बेरी । हमही होव दासिका तेरी ॥  
 जेठी कौं दै सकल सहेली । आप चली वश करन अकेली ॥  
 सिंगरो भूषण वसन उतारी । गणिका पहिरि एकही सारी ॥  
 परी विप्रके चरणन जाई । बोली गिरा महा सुखदाई ॥  
 मैंहों बारवधू द्विजराई । छोंडि कुटुंब शरण तुव आई ॥  
 राखहु म्वहिं अपनी सेवकाई । सिंचिहों मैं वाटिका सदाई ॥  
 भिक्षा मांगि जौन तुमल्यावहु । अपनो जूठन मोहिं खवावहु ॥  
 सुनि नारायण गणिका वानी । परमप्रीति ताकी पहिंचानी ॥  
 लियो आपने कुटी टिकाई । तासों सिंचवावाहिं फुलवाई ॥  
 भिक्षा मांगि अन्न जो ल्यावै । अपनो जूठन ताहि खवावै ॥

दोहा—यहि विधि बीते कालकछु, लाग्यो मास अषाढ़ ॥

वन घुमंड चहुँ वोरते, वर्षा कीन्ही गाढ़ ॥ ३ ॥

महावृष्टि लहि परम सुखारी । बारवधू गै कुटी मझारी ॥  
 सोवत रहे विप्र नारायण । इंद्रियजित अति धर्म परायण ॥  
 चापन लगी चरण मनहारी । कोमल पंकज पाणि पसारी ॥  
 जागिउठयो द्विजतेहि क्षणमार्हीं । रह्यो न धीर निरखि तियकारहीं ॥  
 बारवधू दृग बाण चलाई । लिय मनमनसिज फांसफँसाई ॥  
 यदापि रहे अति धीरज धारी । तदपि लगी हिय काम कटारी ॥  
 विसरयो सकल धर्म अरु ज्ञाना । तनुते किय वैराग्य पयाना ॥  
 रम्यो ताहि लै कुटी मझारी । धर्म कर्म निज सकल विसारी ॥  
 याहीते कह वेद पुराना । करै जो कोउ वैराग्य विज्ञाना ॥  
 रहै न संग इकांतहि नारी । नारी डारति सकल बिगारी ॥  
 बारवधू लै विप्र तहांई । रहनलगे वैसिक के नाई ॥  
 रंगनाथ सेवन सब भूलो । काम विटप उरमें अति फूलो ॥

दोहा—यहि विधि लै निजसंग द्विज, गवन भवन कहँ कीन ।

हाव भाव करिके अमित, चरो सों करि लीन ॥ ४ ॥

भगिनीसों अस जाय सुनाई । कियो सत्य प्रण जो मैं गाई ॥  
ताहि सराहन लगीं सयानी । तुवसम कोउ न रूप गुणखानी ॥  
विप्रचित्त जो कछु घर रहेऊ । बारवधू सरवस सो गहेऊ ॥  
जब कछु रह्यो न द्विज घरमाहीं । तब आदर कीन्ही कछु नाहीं ॥  
द्विजको घरते दियो निकारी । बारवधू पीठहि पद मारी ॥  
गणिका विवश रह्यो महिदेवा । तदपि तज्यो नहिं ताकी सेवा ॥  
परे रहैं ताही के द्वारा । मिलै न यद्यपि कछू अहारा ॥  
एक समय जब भइ अधराता । तब प्रभु भुक्ति मुक्तिके दाता ॥  
कमला कर गहि विचरन हेतू । कढ़े नगर महँ कृपानिकेतू ॥  
सोइ गणिका द्वारे है नाथा । निकसत भयो रमाके साथ ॥  
गणिका द्वार देखि द्विज काहीं । हँसत भये पछिताय तहाहीं ॥  
पूछ्यो रमा हँस्यो प्रभु कैसो । देहु बताय प्रयोजन जैसो ॥

दोहा—प्रभु कह यह द्विज माल रचि, रह्यो चढावत मोहिं ॥

सो विवेक तजि वश भयो, गणिका को मुखजोहि ॥५॥

तब कमला बोली मुसकाई । तवजन किमि दिय धर्म विहाई ॥  
तुम्हरो दास विषय वश होई । यह अचरज मानी सब कोई ॥  
ताते प्रभु पूरण करि आसां । निर्मल करहु आपनो दासा ॥  
सुनि कमलके वैन कृपाला । लै कंचन भाजन तेहि काला ॥  
गणिका भवन गवन प्रभु कीन्ह्यो । ताहि जगाय वचन कहि दीन्ह्यो  
नारायण द्विज मोहिं पठायो । तोहिं देन कछु मैं इत आयो ॥  
सुनि गणिका द्रुत खोलि कपाटा । जोहन लगी नारायण बाटा ॥  
तेहि कंचन भाजन प्रभु दीन्ह्यो । गणिका मोद सहित लै लीन्ह्यो ॥  
कहत भई हेदूत तुराई । ल्यावहु नारायणहिं बोलाई ॥

दूत रूप धरि द्रुत प्रभु आये । नारायणको वचन सुनाये ॥  
 जाके हित तैं अति दुखपावै । प्राणप्रिया सो तोहिं बोलावै ॥  
 वचन सुनत नारायण काना । मान्यो बहुरि मिले मम प्राना ॥  
 दोहा—दौरतहीं गमनत भयो, द्रुत गणिका के गेह ॥

रंगनाथ मंदिर गये, किये दास पर नेह ॥ ६ ॥

भयो भोर तब आय पुजारी । तहाँ न कंचन पात्र निहारी ॥  
 चहूँ वोर माच्यो अस सोरा । कंचनपात्र चोरायो चोरा ॥  
 हेरन लागे सबै पुजारी । राजाके ढिग कह्यो पुकारी ॥  
 भूपति दूत नगरमहँ हेरे । गणिका के घर पात्रहि हेरे ॥  
 भूपति कह्यो दूत तब जाई । गणिका लीन्ह्यों पात्र चोराई ॥  
 राजा वेश्या पकरि बोलायो । गणिका संग नारायण आयो ॥  
 राजा कह्यो पात्र कहँ पायो । बारवधू तब वचन सुनायो ॥  
 दूत हाथ मोहिं विप्र पठायो । द्विज कह दूत कहाँ मैं पायो ॥  
 गणिका अरु नारायण केरो । होत भयो संवाद चनेरो ॥  
 तब राजा कह सचिव बोलाई । पात्र देहु मंदिर पठवाई ॥  
 इन दोइमें जो होवै चोरा । पावै तौन दंड अति चोरा ॥  
 तौने निशा स्वप्न महँ आई । राजा कहँ भाष्यो यदुराई ॥

दोहा—नारायणहै दास मम, भयो विषय आधीन ॥

यहि हित हमही पात्रलै, बारवधू कहँ दीन ॥ ७ ॥

राजा जागि सभा महँ आयो । द्रुत नारायण द्विजहिं बोलायो ॥  
 किय प्रणाम नरनाह उदारा । क्षमहु विप्र अपराध हमारा ॥  
 तुमतो हौ अनन्य हरिदासा । तुम्हरे हित हरि कियो प्रयासा ॥  
 कंचन भाजन गणिकहि दीन्ह्यों । दूत कर्म तुम्हरे हित कीन्ह्यों ॥  
 अस कहि छोड़ि दियो दोउकाहीं । गणिका गै अपने घर माहीं ॥  
 विप्र विचार कियो तिहि काला । मोर नाथहै दीनदयाला ॥

धिगधिग मांह अस नाथ विहाई । भयो विवश गाणिकाके जाई ॥  
अस विचारि मंदिर द्विज आयो । रुदन करत प्रभुको शिरनायो ॥  
बार बार कह प्रभुहि पुकारी । मेरे नहि प्रभु संपति भारी ॥  
बारबधू लागी मम छाती । प्रायश्चित्त करों केहि भाँती ॥  
अस कहि व्रत करि भूसुर सोई । रोवत सोइ रह्यो दुख गोई ॥  
स्वप्न माहँ कह द्विजहि मुरारी । प्रायश्चित्त करहु अस भारी ॥

दोहा—तीरथ सब अरु व्रत सकल, यज्ञ सकल अरु दान ॥

संतचरण जल में बसत, ताहि करौ तुम पान ॥ ८ ॥

भोर जागि द्विज लहि सुख भारी । सब साधुन पद लियो पखारी ॥  
सादर किय चरणामृत पाना । मिटे अनंत जन्म अव नाना ॥  
तबते सकल संत मतिधामा । दिय भक्तांगि रेणु अस नामा ॥  
तबते सकल आश द्विज छोड़ी । भज्यो अनंद रमा हरि जोड़ी ॥  
विविधभाँति रचिपद हरि केरे । गावैं रंग नाथके नेरे ॥  
सो गणिका हरि चरित विलोकी । मानि गलानि भई अति शोकी ॥  
वरकी संपति संतन दीन्ही । आप विरति पंथा गहि लीन्ही ॥  
रंगनाथके मंदिर जाई । त्राहि त्राहि कहि पद शिरनाई ॥  
क्षमहु नाथ मेरो अपराधा । तुम्हरे शरण न एकौ बाधा ॥  
रचिरचि कोमल पद सुखदाई । गावति निशि दिन लाजविहाई ॥  
साधुनको जूठन मितखाती । प्रेममग्न चितवाति दिन राती ॥  
कछु दिन महँ गणिका हरिदासी । भै वैकुण्ठ नगरकी वासी ॥

दोहा—देखदुरे भाई सकल, यह सतसंग प्रभाउ ॥

गणिका पाई परमपद, लग्यो न कलिकर दाउ ॥ ९ ॥

इति श्रीरामरसिकावल्यांकलियुगखंडेषष्ठोऽध्यायः ॥ ६ ॥

## अथ चोलमहीपकी कथा ॥

सोरठा—अब वरणों इतिहास, सुंदर चोल महीपको ॥

सुनहु संत सहुलास, निचुलानगरीजोरह्यो ॥ १ ॥

धर्मधुरंधर धरणि अधीशा । नित नावत संतन पद शीशा ॥  
 क्षत्री जाति विप्र पद सेई । परमप्रतापी शत्रु अजेई ॥  
 सत्यसंध अति सुंदर दानी । गो द्विज देव सदा सनमानी ॥  
 भूप अनन्य रंगपति दासा । विषयविहीन भक्ति की आसा ॥  
 निचुला नगरी परम सोहावनि । जामे वसति विप्रतति पावनि ॥  
 नृपकर यक अभिराम अरामा । जामें जात मिलत मनकामा ॥  
 रोज राव वाटिका सिधारे । प्रभु अर्पण हित कुसुम उतारे ॥  
 तेहि वाटिका मध्य छवि छाई । सरसीरही एक सुखदाई ॥  
 एक समय नृप गये प्रभाता । तोरन लगे विमल जलजाता ॥  
 तहँ निरख्यो सरसीके तीरा । कन्या एक सुछवि गंभीरा ॥  
 कोहौ तुम पूछ्यो नरनाहा । कन्या बोली सहित उछाहा ॥  
 का करिहौ नृप पूछि प्रसंगा । चाहहिं हम श्रीपति अँग संग्गा ॥

दोहा—और पुरुष की आशनाहिं, करु यतनो उपकार ॥

रंगनाथके संगमें, होइ विवाह हमार ॥ १ ॥

भूपति महा भागवत जानी । कन्या को अपने घर आनी ॥  
 ताको निजकन्या नृप मान्यो । तासु विवाह नाथ सँग ठान्यो ॥  
 जाइ रंगमंदिर महँ राजा । कीन्ह्यों विनय प्रेम भरि काजा ॥  
 भौन आइ पुनि तिलक पठायो । लग्न सोधाइ बरात बोलायो ॥  
 सत्य पुहुमिपति प्रेम विचारे । प्रभु प्रत्यक्ष पालकी सवारे ॥  
 मंदिर ते कटि नृप घर आये । विधि विवाह की सकल कराये ॥  
 राजा दीन्ह्यों कन्यादाना । अपने कर लीन्ह्यों भगवाना ॥  
 कन्या मंदिर पगुधारा । माचि रह्यो पुर जयजयकारा ॥

निजसर्वस दिय दाइज राजा । मान्यो अपने को कृतकाजा ॥  
कन्या लीन भई हरिमाहीं । नृप कीरति फैली चहुँ वार्हीं ॥  
भूपति संतन जूठनखाहीं । रंगद्वार महुँ रहैं सदाहीं ॥  
प्रेम प्रभाव लखहु सब भाई । प्रगट विवाह कीन यदुराई ॥

दोहा—धनि भूपति धनि कन्यका, धनि नगरीके लोग ॥  
जे देख्यो प्रत्यक्ष यह, हरि विवाह संयोग ॥ २ ॥

इति श्रीरामरसिकावल्यंकलियुगखंडेसप्तमोऽध्यायः ॥ ७ ॥

## अथ जोगिबाहकी कथा ॥

दोहा—जोगिबाह हारिभक्त को, कहौ सुभग इतहास ॥  
रंगनाथको पद विरचि, कीन्हों भव दुख नास ॥१॥

सोई निचुला नगरी माहीं । रह्यो शूद्र इकरचि घर काहीं ॥  
ताकी गर्भवती भै नारी । हरि तेहि कृपा कटाक्ष निहारी ॥  
गर्भहि में उपज्यो तेहि ज्ञाना । बालक भयो विज्ञान निधाना ॥  
रोवत गावत हँसत बतातो । राम नाम मुख निकसतजातो ॥  
बिन हरि नाम कट्टै नहिं वानी । हरिको सुमिरत उमिर सिरानी ॥  
द्वादश वार्षिक भोजब बालक । तज्यो कुटुंबसुमिरियदुपालक ॥  
रंगनगरमहुँ बस्यो सिधारी । रचन लग्यो हरि पद मनहारी ॥  
सुर मूर्च्छना ग्राम लै ताला । गावत कृष्ण सुयश सब काला ॥  
याम यामेक राग रागिनी । हरि पदावली मोद पागिनी ॥  
रंगद्वार महुँ गाय सदाहीं । कालक्षेप करत सुखमाहीं ॥  
प्रेम मगन ढारत दृग आंसू । गावत रहै न भूख पियासू ॥  
रैन दिवस तेहि गान अधारा । भूली सकल सुरति संसारा ॥

दोहा— एकसमय अधरात कै, सुकवि करत रह गान ।

है प्रसन्न सुनि गान कह, कमलासौंभगवान ॥ १ ॥

सुकवि नाम मम दास सुजाना । रचि पद करत मोर यश गाना ॥  
अतिशय नीक लगत मोहिं प्यारी । तब बोलीं पुनि सिंधुकुमारी ॥  
रुचत तुमहिं जो गायक गाना । तौबोलवावहु ढिग भगवाना ॥  
रमा वचन सुनि गुनि जन अपनो । सुक पूजकहि दियो प्रभु सपनो  
गायक सुकविनामपहँ जाई । ल्यावहु ममढिगतुरतलेवाई ॥  
पूजक सुकवि जागि निशिमाहीं । मंदिर खोलि कपाटन काहीं ॥  
बाहिर कढि हेरन तेहिलागा । कहँगावत गायक बड़भागा ॥  
सुकवि बैठि कावेरी तीरा । गान करत रह प्रेम अधीरा ॥  
सुक पूजक तोहिं कंध चढ़ायो । रंगनाथके ढिग पहुँचायो ॥  
रंग चरण ढिग गावन लाग्यो । हरिहू तासु प्रेम महँ पाग्यो ॥  
दैकेमार पूजक पगु धारचो । भोर भये पुनि द्वार उवारचो ॥  
लखो सुकवि कहँ तेहि थल नाहीं । लीन भयो हरिचरणन माहीं ॥

दोहा—केवल हरि यश गानते, सुकवि पाय अनुराग ।

गोपद सम भवनिधि तरचो, लग्यौ न कलियुग दागर

इति श्रीरामरसिकावल्यांकलियुगखंडेअष्टमोऽध्यायः ॥ ८ ॥

### अथ भक्तपरकालकी कथा ॥

सोरठा—भयो भक्त परकाल, तासु कथा अब कः

श्रोता बुद्धि विशाल, सुनहु सबै चित लाइकै ॥ १ ॥

कावेरी पश्चिम तटमाहीं । नाम पुरी परिरंभ तहाँहीं ॥  
तहँ इक शूद्र नील असनामा । रह्यो शंभुपदरत बलधामा ॥  
महामनोहर तासु स्वरूपा । गुणआगर नागर कवि भूपा ॥



याचक कल्पवृक्ष तेहि जान्यो । रमनी तेहि रतिपति अनुमान्यो  
अंतक सरिस शत्रु तेहि देख्यो । कवि सब वाल्मीकि सम लेख्यो  
तहँ परिरंभपुरी कर राजा । रह्यो एंक जो बली दराजा ॥  
दियो ताहि संतति नहिं धाता । ताते रह्यो दुखित कृशगाता ॥  
सो मनमें अस कियो विचारा । सबगुण पूरित करौं कुमारा ॥  
सबगुण पूरित नर जग माहीं । खोजन लग्यो भूप चहुँ वार्हीं ॥  
सब गुण पूरित नील निहार्यो । पुत्र करन तेहि भूप विचार्यो ॥  
शूद्र जानि बरज्यो सबकाहू । पै कछु नहिं मान्यो नरनाहू ॥  
शंभुकृपा वश नील उदारै । सुदिन पूंछि नृप कियो कुमारै ॥  
ताको नाम धन्यो परकाला । वोज तेज बलबुद्धि विशाला ॥

दोहा—कछुक काल महँ रागवश, भयो भूप वशकाल ।

पुहुमीपति पुहुमी प्रथित, शासन किय परकाल ॥ १ ॥

नित नवमोद प्रजन कहँ बाढ़ा । धर्म बढ़्यो जल यथाअषाढ़ा ॥  
भयो विभव सुरपति सम ताको । शासन कियो सकल वसुधाको ॥  
शासन करत ताहि दश दिशहूँ । रह्यो अधर्म अवनिमहँन कहूँ ॥  
तेहि परिरंभ पुरीके नेरे । रह्यो नागपुर प्रजा घनेरे ॥  
तहँ थक वैद्य रह्यो मतिवाना । शीलवंत भागवत प्रधाना ॥  
पुरी निकट यक रही तलाई । फूली कंजन की समुदाई ॥  
वैद्य रोज मज्जन हित जाई । तहँ पूजै यदुनाथ नहाई ॥  
एक दिवस सरसी तट माहीं । लख्यो वैद्य लघु कन्या काहीं ॥  
रही वैद्यके संतति नाहीं । लिय उठाय दारिका तहाँहीं ॥  
घरमे ल्याइ दियो घरनीको । मानहु पुत्र कह्यो अस तीको ॥  
दंपति दुहिता पालन करहीं । अपने उर आनँद अति भरहीं ॥  
जस जस बढ़ति कन्यकाजाई । तसर विभव होत अधिकाई ॥

दोहा—सुता रूप गुण शील सुनि, सो परकाल भुवाल ॥

बोलि चिकित्सक भवन में, वचन कह्यो तेहिकाल ॥२॥  
 वैद्य कहाँ कन्या तुम पाई । कौन भाँति तुम्हरे घर आई ॥  
 वैद्य कहो सरसीके तीरा । हम दुहिता पाई मतिधीरा ॥  
 मेरे घर यह भई सयानी । सकल भाँति संपति सुखदानी ॥  
 राजा कह्यो कन्यका केरो । वैद्य विवाह करहु तुम मेरो ॥  
 वैद्य कही यह भली बखानी । पै कछु कारण लीजैजानी ॥  
 विनाशंख चक्राङ्कित काहीं । व्याह करन कहती यहनानी ॥  
 रोज़हि भोजन साधु करावै । तब यह अन्न पान मुखल्यावै ॥  
 वैद्य वचन सुनितुरत भुवाला । चक्राङ्कित हैगो परकाला ॥  
 तबदै साक्षी पावक काही । वैद्य कन्यका नृपहि विवाही ॥  
 नित नृप सदन जे साधु सिधारै । भूपति भोजन दै सतकारै ॥  
 सहस साधु भोजन करवाई । भोजन पान करै नृपराई ॥  
 जेतो धन नृपके घर होवै । सकल संत सेवन महँ खोवै ॥

दोहा—तहँ एक बड़ो भुवाल कोउ, चाढ़ि आयो दल साजि ॥

तोप तुपक आयुध विविध, पैदर वारन बाजि ॥ ३॥  
 सो पठ्यो सेनापति काहीं । भूपति घर आयो भय नाहीं ॥  
 कह परकालहिसों अस बाता । देहु दंड नहिं दंड अघाता ॥  
 तब परकाल कही अस बानी । हमरे नहिं सुवरण की खानी ॥  
 जो कछु राज्य माहिं धन पावैं । सो सब विप्रन साधु खवावैं ॥  
 जो भूपति करिहैं बरजोरी । तौ देहैं कृपाण मुख मोरी ॥  
 हम तो हैं अनन्य हरिदासा । राखैं कबहुँ न कोहुकी त्रासा ॥  
 अस कहि सेनापति कहैं राजा । दियो निकासि समेत समाजा ॥  
 सेनापति चलि निज प्रभु पाहीं । वचन कह्यो भय भारि उरमाहीं ॥  
 षड़ो घमंडी नृप परकाला । तुमरो शासन मान्यो ख्याला ॥

ताते ताहि दंड अस दीजै । ताको राज्य सकल लै लीजै ॥  
सुनि भूपति किय कोप प्रचंडा । दीन्हो शासन भटन उदंडा ॥  
चोरि लेहु परकालपुरी को । रहै न थेल निकसन अगुरीको  
दोहा—भूपवचन सुनि सैन्य सब, चली निसान बजाय ॥

हय गय पैदर पदन की, धूरिधुंध रहि छाये ॥ ४ ॥  
नृप आवत लै सैन्य विशाला । सुनी खबरि अस नृपपरकाला ॥  
रामचरण सुमिरयो मनमाहीं । लैनेसुक दल भय कछु नाहीं ॥  
साधु चरण धरि अपनो शीशा । भाषत जयति कौशलाधीशा ॥  
पुनि अस विनय कियो परकाला । हे दयालु दशरथके लाला ॥  
तुमहिं समर्पितहै यह राजू । राखहु आजु लाज रघुराजू ॥  
असकहि सन्मुख भयो नरेशा । जिमि मतंग गण माहिं मृगेशा ॥  
दुहुँ दिशिते बहु बजे नगारे । दुहुँ दिशि भट हथियार निकारे  
प्रथमहि पसर कियो परकाला । सुमिरि चरण युग कोशलपाला ॥  
तोपैं तुपक तीर तरवारी । चलत भई दुहुँ दिशते भारी ॥  
जानि अनन्यदास रघुनाथा । प्रगटत भे लै धनु शर हाथा ॥  
क्षणमें सकल भूप दल भारी । प्रभुडारयो निज सायक मारी ॥  
भग्यो भूप जय लह्यो प्रकाला । लह्यो न कछु परकाल कसाला ॥  
दोहा—भूप दीन है दल रहित, जानि प्रकाल प्रभाव ॥

त्राहित्राहि कहि दौरिकै, गहत भयो दोउ पांव ॥ ५ ॥  
कीन्ह्यो बहुरि विनय करजोरी । मैहों नाथ शरण अब तोरी ॥  
देहु कछुक धन तौ घर जाऊं । तिहरो सुयश सदा मैं गाऊं ॥  
तब परकाल कह्यो अस वैना । हमरे घर महँ धन कछु हैना ॥  
रह्यो सो ब्राह्मण वैष्णव खायो । तुम्हरेहेतु न भवन धरायो ॥  
तेहि निशि माहिजानि जनअपनो । रघुपतिदिय परकालहि सपनो  
उचित देव धन भूपति काहीं । शरणागत कहँ अनुचित नाहीं ॥

कांचीपुरी माहँ जब ऐहौ । भूपतिदेन हेतु धन पैहौ ॥  
 भोर जागि परकाल भुवाला । भाष्यो तुरत ताहि महिपाला ॥  
 मम सँग दीजै सचिव पठाई । ल्यावै कांचीते धन जाई ॥  
 अस कहि कांची गयो प्रकाला । संग सचिव पठयो महिपाला ॥  
 जा दिन कांची सचिव सिधारचो । तादिननाथ मनुज वपु धारचो ॥  
 वृषभनमें धन भूरि भराई । दियो तासु डेरा पहुँचाई ॥  
 दोहा—मंत्री लै धन वर गयो, जान्यो नहिं परकाल ॥

पूछन लाग्यो जननसों, कहां सचिव यहि काल ॥ ६ ॥  
 प्रजा कह्यो तिहरो जन दयऊ । धन लै सचिव बहुरि सो गयऊ ॥  
 प्रभु चरित्र परकाल विचारी । हरिकी कीन्ही स्तुति भारी ॥  
 बहुरि आपने भवन सिधारी । तुरत बोलाय कह्यो निज नारी ॥  
 मोरि दीनता देखि मुरारी । कीन्हीं समर सबन सँग भारी ॥  
 मेरे हित धरि मनुज स्वरूपा । दीन्हीं वित्त विपुल तेहिभूपा ॥  
 मोहिधिगमोहिधिग बारहिंवारा । तजौं न तिनके हित परिवारा ॥  
 चलु बन बसि कहुँ भजिय सियापति । देहिं लुटाय साधु कहँ संपति ॥  
 नारी सुनि संमत सो कीन्हीं । साधुन बोलि सकल धन दीन्हीं ॥  
 आप वसे वन महँ दोउ प्रानी । भजहिं सप्रेम जानकी जानी ॥  
 तहँ जे साधु तासु ढिग आवैं । विन संपति केहि भाँति खवाँवैं ॥  
 तब परकाल चोरावन लागे । साधुखवावन महँ अनुरागे ॥  
 छल बल चोरी कर धन ल्यावै । ताते सिगरे संत

दोहा—एक समय चोरी करन, गये धनिकके धाम ॥

कनक कटोरा लै कढ़ी, तौन धनिक की वाम ॥ ७ ॥  
 तासु कटोरा हरचो प्रकाला । जय गुरु कही धनिक की बाला ॥  
 तब फेंक्यौ परकाल कटोरा । भयो धनिक तियको अति भोरा ॥  
 तब तिय निज पतिसों कह जाई । भाजन कनक हरचो कोउआई ॥

सो सुनि धनिक नारि युत तहँवा । कटि आयो प्रकाल रह जहँवा॥  
 परकालहि वैष्णव अवलोकी । महिगत भाजन लखिभोशोकी॥  
 कह्यो नारि कहँ आँखि देखाई । साधु संग का करी ठिठाई ॥  
 साधु कौनहित पात्र न लीन्ह्यो । कारण कौन फैंकि महि दीन्ह्यो॥  
 तिय कह मैं अपराध न ठान्यो । जयगुरु यतनो वचन बखान्यो॥  
 तब तिय को पति भयो सकोपा । भाष्यो अरी धर्म किय लोपा ॥  
 संपति सोइ जो साधु हित लागै । सोइ कीरति जो जगमहँ जागै ॥  
 दोहुँन की लखि अनुपम प्रीती । तब परकाल कियो अति प्रीती॥  
 दे परिदक्षिण कियो प्रणामा । पुनि परकाल गयो निजधामा ॥  
 दोहा—तबते सबके भवनकी, चोरी तज्यो प्रकाल ॥

राह लागि लूटै जनन, साधुन हित सब काल ॥ ८ ॥  
 लूट्यो जबहिं जनन बहुकाहीं । पथिक चले पंथा तेहिं नाहीं ॥  
 मिल्यो न धन नित परचो उपासा । साधु न आवै तब तेहिंपासा ॥  
 तब परकाल महादुखछायो । मरन आपनो उचित गनायो ॥  
 तब प्रभुको संकट अति परेऊ । पार्षद सहित मनुज वपु धरेऊ॥  
 भये पक्षिपति तुरत तुरंगा । पार्षद भे सेवक बहुरंगा ॥  
 कमलाको दुलही रचि लीने । दूल्हा आप भये परवीने ॥  
 तेहि भारगह्वै कटे मुरारी । लखिप्रकाल तहँ गयो सिधारी ॥  
 घेरि भटनसों सकल बराता । बोल्यो वणिक जानि असवाता॥  
 भूषण दीजै सकल उत्तारी । नातौ हम हनिहैं तरवारी ॥  
 हरि अपनो अरु कमला केरो । दिय उत्तारि आभरण घनेरो ॥  
 औरहु जो धन रह्यो अनंता । सो परकालहि दियो तुरंता ॥  
 उक्यो न सो धन तासु उठायो । तब प्रकाल अस वचन सुनायो॥

दोहा—शिरधारि मेरे भवन महँ, दीजै धन पहुँचाय ॥

नातो यहिथल ते कहूँ, तुम पैहौ नहिंजाय ॥ ९ ॥

तब प्रभु वचन कह्यो मुसकाई । देत एक हम मंत्र बताई ॥  
 धन उठाय कै मंत्र प्रभाऊ । जाहु भवन कहँ सहित उराऊ ॥  
 देहु मंत्र तब कह परकाला । तबहिं कान लगि दीनदयाला ॥  
 दिय अष्टाक्षर मंत्र सुनाई । धरचो हाथ माथे यदुराई ॥  
 पुनि पार्षद युत त्रिभुवन भूषा । प्रगट कियो आपनो स्वरूपा ॥  
 रमा सहित निज नाथ निहारी । त्राहि त्राहि परकाल पुकारी ॥  
 गिरचो चरणमहँ प्रेम अगाधा । कह्यो क्षमहु मेरो अपराधा ॥  
 प्रभु कह नहिं अपराध तिहारो । रह्यो मनोरथ यही हमारो ॥  
 अस कहि भे प्रभु अंतर्द्वाना । कांची किय परकाल पयाना ॥  
 मारग महँ भूखो अति भयऊ । ताको कोउ भोजन नहिं दयऊ ॥  
 तहाँ अष्टभुज नरहरि देवा । सो भरि कनक थार महँ मेवा ॥  
 भोजन दियो पंथ महँ आई । तहँ प्रकाल अति गयो अवाई ॥

दोहा—पुनि पूछ्यो परकाल तेहि, तुम कोहौ माहिदेव ॥

किमि जान्यो मोहिं क्षुधित अति, करी आय अति सेवा ॥  
 नरहरि कह हमहँ तुव नाथा । तोहि रक्षत वागैं तुव साथ ॥  
 परचो चरण महँ तब परकाला । कह्यो तुमहिं सति दीनदयाला ॥  
 नरहरि भे तब अंतर्द्वाना । कांची किय परकाल पयाना ॥  
 वरदराज को दरशन लीन्ह्यो । वासरतीनि बास तहँ कीन्ह्यो ॥  
 पुनि परकाल रंगपुर आये । रंगनाथ लखि अति सुख पाये ॥  
 हरिसों जो धन लियो छँड़ाई । सो सब रंगनगर महँ लाई ॥  
 कारीगरन बोलाय अपारा । बनवायो पुर सात प्रकारा ॥  
 कछु धन वट्यो बनावत माहीं । गयो तुरंत नागपुरकाहीं ॥  
 तेहिं पुर रहे जैन बहुतेरे । तिनके भवन माहँ चलि हेरे ॥  
 पारसनाथ केरि मनहारी । रही कनक मूरति अति भारी ॥  
 बरवस तेहिं उठाय परकाला । लयायो रंगनगर तेहिं काला ॥



सोइ मूरतिको सोन कटाई । दीन्ह्यो कारीगरन बँटाई ॥

दोहा—होत भये पूरे जबै, पुरके सात प्रकार ॥

तब परकाल उदार अति, मन मँहँ कियो विचार ॥ ११ ॥

कारीगर कीन्ह्यो अति कामा । इनको दीजै कौन इनामा ॥

अस विचारि कावेरी तीरा । बैज्यो सो प्रकाल मतिधीरा ॥

हरिसों कह्यो पुकारि पुकारी । रंनगाथ सुनु विनय हमारी ॥

कारीगरन मुक्ति प्रभु दीजै । नातौ प्राण हमारे लीजै ॥

प्रभु प्रसन्नहै शिल्पिन काहीं । पठयो सबन धाम निजमार्हीं ॥

जैन जाय निज भूप पुकारे । हरचौ प्रकालहि प्रभुहि हमारे ॥

राजा तुरत प्रकाल बोलायो । जैनिन सों संवाद करायो ॥

लियो प्रकाल जैनमत जीती । तब राजा कीन्ह्यो अति प्रीती ॥

भो प्रकाल को शिष्य भुवाला । नास्तिक भे आस्तिक तेहिकाला ॥

रंगनगर परकाल सिधारे । कियेवास चिरकाल सुखारे ॥

प्रभु शासन लहि पुनि परकाला । भद्राश्रम गमन्यो तेहिकाला ॥

परकाल समाधि लगाई । बैज्यो रामचरण मन लाई ॥

दोहा—करि समाधि बहु काल लगि, भक्तराज परकाल ।

ब्रह्मरंभ्रहैप्राणतजि, गयो जहाँ रघुलाल ॥ १२ ॥

इति श्रीरामरसिकावल्यांकलियुगखंडेनवमोऽध्यायः ॥ ९ ॥

## अथ गोदाअंबाकी कथा ॥

दोहा—विष्णुचित्तिकी कन्यका, गोदाअंबा नाम ।

तिनको मैं इतिहास अब, वर्णनकरौं ललाम ॥ १ ॥

विष्णुचित्तिको तुलसी बागा । तामें कियो परम अनुरागा ॥

तुलसी सींचतही इक काला । मिली कन्यका रूप रसाला ॥

लखि कन्यका भयो संदेहा । दयालागि ल्याये निजगेहा ॥



रातिस्वप्नमहँ तेहि भगवाना । कन्याको सब भेद बखाना ॥  
 जब वराहवपु धरणि उधारचो । तब धरणी मोहिं वचन उचारचो  
 पूजा तुमहिं कौन प्रियलागै । केहिविधि तुमहिंदासअनुरागै ॥  
 तब मैं कह्यो सुमनकी पूजा । ताते म्वहिं प्रिय और न दूजा  
 करै नामकीर्तन जो मोरा । तापर मम अनुराग अथोरा ॥  
 ताते भूमि कन्यका भई । तुम्हरे भवन वास मन दई ॥  
 यह कन्या सेवत जो रहिहौ । तौ तुम अवशिपरमपद लहिहौ  
 यहिविधि राति स्वप्न जब देख्यो । विष्णुचित्तिबड़भागहिलेख्यो  
 जातकर्म कन्याकर कीन्ह्यो । दंपति महामोद मन लीन्ह्यो ॥

दोहा—कालपाइ जब कन्यका, भई युवा छविछाई ।

हरिके हित मालारचै, हरिके गुण गण गाइ ॥ १ ॥

कन्याकर विरचत वनमाला । विष्णुचित्तिलै प्रेम विशाला ॥  
 रंगनाथके मंदिर जाई । देहिं आपने कर पहिराई ॥  
 एकसमय गोदा सुकुमारी । तुलसीमाल रची मनहारी ॥  
 अतिशय सुंदर माल निहारी । लियो आपने शिरमहँ धारी ॥  
 लैदर्पण देखन मुखलागी । विष्णुचित्ति आये बड़भागी ॥  
 सुता उछिष्ट देखि वनमाला । विरच्यो दूसर द्रुत तेहिंकाला ॥  
 लै वनमाल रंग गृह गयऊ । निजकरसों पहिरावत भयऊ ॥  
 रंगनाथ प्रभु तब मुसकाई । विष्णुचित्तिको गिरा सुनाई ॥  
 गोदाकी जूँठी जो माला । सो पहिरावहु म्वहिं यहिकाला  
 यद्यपि यह वनमाल अनूठी । पैमोहिं प्रिय गोदाकी जूँठी ॥  
 विष्णुचित्ति सुनि प्रभुकी वानी । अपने मन अतिआनँदमानी ॥  
 सोइ वनमाल कन्यका सोऊ । प्रभुको अर्पण कीन्ह्यो दोऊ ॥

दोहा—तब भाष्यो प्रभु वैन अस, राखहु सुता निकेत ।

हम व्याहव यह कन्यका, ठानु स्वयंवर नेत ॥ २ ॥

विष्णुचित्ति तव अति सुखपायो । कन्यालै अपने घर आयो ॥  
 कन्याएक समय पितुकाहीं । वचन कह्यो मोदित मनमाहीं ॥  
 यहिब्रह्मांड माहँ सुनु ताता । केतने दिव्य धाम अवदाता ॥  
 विष्णुचित्ति तव लग्यो सुनावन । जेतने दिव्य धाम हरिपावन ॥  
 श्रीविकुंठमहँ परमउदारा । वासकरै वसुदेवकुमारा ॥  
 पुनि आमोद लोक जेहिं नामा । निवसत संकर्षण बलरामा ॥  
 लोक प्रमोद प्रद्युम्न निवासा । सो मोदहि अनिरुद्ध अवासा ॥  
 श्वेतद्वीपमहँ परमसुजाना । वसै क्षीरशायी भगवाना ॥  
 बदरीवन जो धाम विशाला । नरनारायण रहै कृपाला ॥  
 नीमषार जो क्षेत्र विख्याता । रहै योगपति हरि गति दाता ॥  
 मुक्तिनाथ महँ शालिग्रामा । अवध वसे सिय सानुज रामा ॥  
 मथुरामहँ निवसे यदुनंदन । हरत प्रपन्न जनन भव फंदन ॥

दोहा—विश्वनाथवपु वसतहँ, काशी महँ भगवान ।

तारकमंत्र सुनायकै, देत जनन निरवान ॥ ३ ॥

अवनी नाथ नाम जिन केरो । किये अवंतीनगरी डेरो ॥  
 द्वारवती यदुवंश विभूषण । शरणागत वत्सल हत दूषण ॥  
 नंदनंदन जिनको है नाऊं । निवसत वरसाने नंदगाऊं ॥  
 वृंदावनमहँ आनंद रासी । निवसत वृंदाविपिनविलासी ॥  
 कालीदह गोविंद निवासा । गोवर्द्धन गिरिधर करवासा ॥  
 गिरिगोमंत सौरि प्रभु रहहीं । हरिद्वार यदुपति सुखलहहीं ॥  
 प्रागराजमहँ वेणी माधो । गया गदाधर पूरित साधो ॥  
 गंगासागर कपिल अनूपा । नंदिग्राम भरताग्रज रूपा ॥  
 सीतालषण सहित रघुराई । निवसै चित्रकूट नितआई ॥  
 विश्वरूप वस क्षेत्र प्रभासा । कूर्मक्षेत्र महँ कूर्म निवासा ॥  
 जगन्नाथ नीलाजल माहीं । युत बलभद्र सुभद्र सोहाहीं ॥

सिंहशैल नरसिंह विराजें । गदानाथ तुलसी वन भ्राजें ॥

दोहा—श्वेताचलमहँ नरहरी, करैं वास सब काल ।

साक्षी नारायण वसैं, क्षेत्रपरात्म विशाल ॥ ४ ॥

धर्मपुरी गोदावारि तीरा । योगानंद वसैं यदुवीरा ॥

कृष्णावेणी तट अस्थाना । वसैं अंधनायक भगवाना ॥

धाम अहो बल सुपरन गिरिपर । तहँ नृसिंहनिवसत भवभयहर ॥

पंढरपुरमहँ विठ्ठल स्वामी । कांचीवरद राज खगगामी ॥

शेषाचल महँ व्यंकटनाथा । करैं वास करि जनन सनाथा

यादवगिरि नारायण वसहीं । घटिकागिरि नृसिंह वपुलसहीं ॥

सोई कांची नगरी माहीं । पारथ सारथि लसैं सदाहीं ॥

तहँ यथोक्त कारी असनामा । लसै रमापति धाम ललामा ॥

तेहि नगरी महँ नरहारे स्वामी । दक्षिण निवसत अंतर्यामी ॥

पश्चिमादिशा त्रिविक्रम सोहैं । निज छवि सुर नर मुनिमनमोहैं

गृध्रसरोवरके तट आई । वसैं विजय राघव रघुराई ॥

वीक्षारम्य क्षेत्र अस नामा । वसैं वीर राघव छविधामा ॥

दोहा—त्रोतादारीलसत हैं, रंगसैन भगवान ।

गजनगरी गज शोकहर, श्रीहारिको स्थान ॥ ५ ॥

बलिपुरवसैं महाबल नामा । श्रीबलिराग रूप छविधामा ॥

क्षीरवती तट पुरी गोपाला । राजतहँ तहँ बालगोपाला ॥

क्षेत्रनाम श्रीमुष्ण अतोला । तहांवसैं प्रभुधरि वपुकोला ॥

नगरएक दक्षिण महि तूरा । वसैं कमललोचन सुखपूरा ॥

तहँ कावेरीके मधिमाहीं । दीप एक भासत चौवांहीं ॥

रंगनाथ सोहत भगवाना । दरशन करत मिलत निर्वाणा ॥

इष्टदेव रघुवंशिन केरे । श्रीवैष्णव तहँ वसत घनेरे ॥

महामनोहर सुंदर रूपा । श्रीभूलीला सहित अनूपा ॥

दक्षिण रामक्षेत्रहै जहँवां । राम जानकी सोहत तहँवां ॥  
 श्रीनिवास इक क्षेत्र महाना । तहाँ लसैं पूरण भगवाना ॥  
 सुभग सुवर्ण नगर इक जोई । सुवरण सुख प्रभु निवसतसोई  
 महाबाहु प्रभु व्याघ्र पुरीमहँ । लसैं चित्रहरि व्योम नगर जहँ  
 दोहा—क्षेत्रउत्पलावर्तमें, यदुकुल कमल दिनेश ।

मणिकोटीमें महाप्रभु,करैं निवास हमेश ॥ ६ ॥

नाम कृष्णपुर सागर तीरा । महाकृष्ण निवसैं यदुवीरा ॥  
 विष्णुक्षेत्र इक परम विख्याता । वसैं अनंत भक्तिके दाता ॥  
 कृष्ण क्षेत्र यक साधु परायण । निवसैं तहँ लक्ष्मी नारायण ॥  
 श्वेत शैल इक वेद प्रमाना । वसैं शांत मूरति भगवाना ॥  
 अग्निहोत्र पुर परम सोहावन । वसैं तहां सुर प्रिय प्रभुवावन ॥  
 भार्गवक्षेत्र एक अभिरामा । निवसैं तहां परशुधररामा ॥  
 इक वैकुण्ठनगर छविधामा । वसैं तहां प्रभु माधवनामा ॥  
 क्षेत्र गरिष्ठ विदित चहुँ घाहीं । भक्त सखा तहँ वसैं सदाहीं ॥  
 चक्र तीर्थ महँ परमप्रकाशी । वसैं सुदर्शन प्रभु छविराशी ॥  
 कुंभकोण महँ शारंगपानी । भूतपुरी महँ सोइ छविखानी ॥  
 कलुषहरन इक क्षेत्रविख्याता । तहँ प्रभुहँ गजेंद्र गतिदाता ॥  
 चित्रकूट इक दक्षिण माहीं । तहाँ वसैं गोविंद सदाहीं ॥  
 दोहा—पुरी उत्तमामें वसैं, नाम अनुत्तम ईश ॥

पद्मविलोचन वसतहँ, श्वेतशैल जगदीश ॥ ७ ॥

परब्रह्म पारथपुर राजै । वृद्धपुरी वृष आश्रय आजै ॥  
 संगमपुरी असंग मुरारी । शरणपुरी शरण्य सुखकारी ॥  
 धनुषक्षेत्र जगदीश्वर नामा । कालमेघ मुद्गरपुर आमा ॥  
 दक्षिण मथुरामें शुभ मंदिर । तहाँ वसैं नामक प्रभु सुंदर ॥  
 वृषपर्वतमहँ सब सुखमाको । नाम सुपर्व राजहै जाको ॥

वर गुण क्षेत्र महा अभिरामा । नाथ नाम तिनको तहँ धामा ॥  
 कुरकापुरी रमापति राजें । गोष्ठीपुर गोष्ठी प्रभु छाजें ॥  
 दर्भसेन महँ सागर तीरा । निवसैं भूमि सैन रघुवीरा ॥  
 धन्वी मंगल पुर सुखदाई । वसैं तहाँ प्रभु कुँवर कन्हाई ॥  
 भँवर क्षेत्र महँ शास्त्र प्रमाना । निवसैं बलशाली भगवाना ॥  
 यक कुरंगपुर अति रमणीया । तहँ प्रभु पूर्ण लसत कमनीया ॥  
 नगर तटी थल सर्वग नामा । वसैं विष्णु वपु अति अभिरामा ॥

दोहा—छुद्र नदीके तीरमें, अच्युत नाम विख्यात ॥

नाम अनंतसैन प्रभु, भद्रपुरी अवदात ॥ ८ ॥

यहि विधि विपुल पुण्य थलमाहीं।विग्रह दिव्य विशेष सोहाहीं ॥  
 जे तिनको पूजन जन करहीं । चारि पदारथ सुख उर भरहीं ॥  
 हरिके विग्रह पंच प्रकारा । तिनमें अर्चा सुलभ अपारा ॥  
 दिव्य रूप जे सकल गिनाये । तिनके चरणामृतको पाये ॥  
 भोजन कीन्हे तासु प्रसादा । पावत गति अस श्रुति मर्यादा ॥  
 हरि मूरति जिनकी नहिं प्रीती । तेशठ लहैं भूरि भव भीती ॥  
 यहि विधि सुनि पितु मुखते बानी । गोदा परम मोद उरमानी ॥  
 सब हरिकी मूरति गुणि सांची । गोदा रंगनाथ महँ राची ॥  
 नितही रंगनाथ गुणगावै । नितहीं माल बनाइ पठावै ॥  
 सोवत जागत तोहिं दिन रैना । रंगनाथ दीसत दोउ नैना ॥  
 इक शत आठ दिव्य हरिरूपा । भारतखंडहि परम अनूपा ॥  
 कथा सकल रूपन सुनि सांची । गोदा रंगनाथमहँ रांची ॥

दोहा—रंगनाथके चरणमहँ, गुणि गोदाकी प्रीति ॥

रंगनाथकी सब कथा, कहन लगे शुभ रीति ॥ ९ ॥

रंगनाथकी गाथा सारी । हम वणैं सज सभग कुमारी ॥

एक समय तप किय करतारा । भये प्रगट भगवंत उदारा ॥  
हरि कह का चाहहु मुखचारी । कह विरंचि अस आश हमारी ॥  
तुमको पूजहिं करिमख भारी । सोपूरण करि देहु मुरारी ॥  
प्रभु कह यज्ञ करहु चतुरानन । पुण्य क्षेत्र कुसुमित जहँ कानन ॥  
अस कहि भे प्रभु अंतर्द्वाना । ब्रह्मा रच्यो यज्ञ सविधाना ॥  
तेहि मखमहँ सुर असुर मुनीशा । आवत भे ध्यावत जगदीशा ॥  
तेहि मखमहँ अति आनँद छाये । महाराज इक्ष्वाकु सिधाये ॥  
रंगनाथ मूरति मखमाहीं । पूजत रहैं विरंचि सदाहीं ॥  
रंगनाथको लखि इक्ष्वाकू । मान्यौ सकल पुण्य परिपाकू ॥  
कह विरंचिसों दोउकर जोरी । इनके पूजनकी मति मोरी ॥  
जो मोपर प्रसन्न प्रभु होहू । रंगनाथ दीजै करि छोहू ॥

दोहा—तब विरंचि बोल्यो वचन, तप कीजै नरनाह ॥

तब अधिकारी होहुगे, पूजनके जगमाँह ॥ १० ॥

सुनि विरंचिके वचन नरेशा । कीन्ह्यो तप सरयूतट देशा ॥  
हैं प्रसन्न विधि अवध सिधार्ह । दीन्ह्यो रंगनाथ सुख छाई ॥  
तबते रविकुलके नरदेवा । माँग्यो रंगनाथ कुलदेवा ॥  
जब रघुनाथ रावणाहिं मारी । सीता सहित अवध पगु धारी ॥  
तिनके संग विभीषण आयो । जान लग्यो लंकहि सुख छायो ॥  
तब रघुपतिसों विनय सुनाई । तुव बिछोह नहिं मोहिं सहिजाई  
निशिचर पतिकी प्रीति विचारी । रंगनाथको दियो खरारी ॥  
धन्य भाग्य गुणि निशिचर नाथा । लंकहि चलयो वंदि रघुनाथा ॥  
जब कावेरी तटमहँ आयो । तहँ कलु नेम विभीषण ठायो ॥  
नेम समापत करि असुरेशा । चलन लग्यो जब अपने देशा ॥  
रंगनाथको लग्यो उठावन । उठे उठाये नहिं जगपावन ॥  
जब शोकितहैं रोवन लग्यो । निशिचर नाथ महादुख पाग्यो ॥

दोहा—तब अकाश वाणी भई, सुनहु निशाचर नाथ ।

हम याहीथल महँ रहब,अब न चलब तुब साथ॥११॥  
 यही भूमि मोको अतिप्यारी । यहि थल महँ रुचि रहनहमारी ॥  
 लंकाते तुम रोजहि आई । मेरो पूजन करहु सदाई ॥  
 जब तुम सुमिरण करिहौ मोहीं । तब मैं प्रगट होब हठि तोहीं ॥  
 प्रभुको शाशनमानि विभीषन । लंकहि गयो सुमिरि आनँदवन ॥  
 रोजहि पूजन कराहि सिधारी । रंगनाथ पद करि रति भारी ॥  
 वसि कावेरीके तट माहीं । रंगनाथ पालत जग काहीं ॥  
 रचो विष्णुकर्मासो मंदिर । परम प्रकाशित मानहुँ चंदिर ॥  
 अति ऊंचे हैं सात प्रकारा । तहाँ वसैं हरिभक्त अपारा ॥  
 कथा रंगनाथक सुनि गोदा । मान्यो मनमहँ परम प्रमोदा ॥  
 इकसै आठ रूप हरि केरे । रंगहि गुन्यो अधिक सब तेरे ॥  
 गोदा कही पितासों वानी । मिलहिं मोहिं किमि जान किजानी ॥  
 विष्णुचित्त तब गिरा उचारी । मार्गशीर्ष व्रत करहु कुमारी ॥

दोहा—वृंदावन महँ गोपिका, मार्गशीर्ष व्रत ठानि ।

लह्यो नंद नंदनचरण, भई सकल सुखखानि ॥ १२ ॥  
 गोदा मार्गशीर्ष व्रत कीन्ह्यो । गान प्रबंध युगल राचि लीन्ह्यो ॥  
 व्रत करि करै मधुर नित गाना । केहि विधि मिलै मोहिं भगवाना ॥  
 एक दिवस निशिमाहँ कुमारी । सपन माहिं मिलिगई मुरारी ॥  
 जागि चहुँ कित चितवन लागी । लख्योनहरिकहँ अतिदुखपागी ॥  
 तबते बैठत बागत माहीं । सोवत जागत वदत सदाहीं ॥  
 देखै रंगनाथकहँ सोई । चितवति काल रैन दिन रोई ॥  
 एक समय गे चंदन बागा । हरिको विरह दून तहँ जागा ॥  
 तासु सखी इक विप्रकुमारी । आई चतुर चारु वपुवारी ॥  
 पूछ्यो ताहि सखी दुख कैसो । होइ यथावरणो मोहिं तैसो ॥



तब गोदा अस गिरा सुनाई । नारायण सपने महुँ आई ॥  
मिले मोहिं दुरिगे पुनि सजनी । तबते कल न परतिदिनरजनी  
विप्रसुता तहुँ कह तेहिपाहीं । बहुत रूप हरिके जगमाहीं ॥  
दोहा—कौन रूपमें रावरी, उपजीहै अति प्रीति ।

सो देखराऊं चित्र लिखि, जातेहोइप्रतीति ॥ १३ ॥

असकहि सखी उतारन लागी । हरिके सकल रूप रति पागी ॥  
लिखत लिखत जब रंगनाथकी । लिखत भई तसवीर हाथकी ॥  
तेहि लखि गोदा गई लजाई । बोली मंद मंद मुसकाई ॥  
यह छलिया सपने मिलि मोसों । गयो पराइ कहों सति तोसों ॥  
सखी कह्यो सुनु गोदा प्यारी । सखि जो हैहों सत्य तिहारी ॥  
रंगनाथ कहँ तोहिं मिलैहों । तोर मनोरथ पूर करैहों ॥  
तब गोदा बोली करजोरी । अब जीवन गति तुव कर मोरी  
जाय रंग मंदिर महुँ प्यारी । कहहु पियहि जस दशाहमारी  
गोदा वचन सुनत मनभाई । चली रंगमंदिर अतुराई ॥  
प्रथमहिं गई मनोहर बागा । रह छबिवंत वसंत सुलागा ॥  
तहुँ देख्यो इक कौतुक प्यारी । सुंदर फूल सेज सुकुमारी ॥  
विरहाकुल श्रीपति तेहि माहीं । लोटिरहे इक पल कल नाहीं ॥

दोहा—विप्रसुता तब चलि निकट, पूछ्यो मधुरिपु काहिं ॥

कौन अहौ तुम हेतुकेहि, लोटहु इत महिमाहिं ॥ १४ ॥

कह्यो वचन तब प्रभु तेहिटेरी । गोदाविरह दशा यह मेरी ॥  
तुमहौ कौनि कहौ केहि हेतू । मोहिं पूछहु यहिविधि छबिसेतू ॥  
हौंतो रंगनाथ हेप्यारी । निज कारण तुम देहु उचारी ॥  
तब अनुग्रहा सखी सयानी । बोली विहसि काज सिधि मानी ॥  
मोहिं गोदा तुव पास पठाई । तासु दशावर्णन इत आई ॥  
गोदा नाम सुनत उठिनाथा । बोले वचन जोरि युगहाथा ॥

मैं हूं ध्यान करतरह ताई । जासु नाम तैं दियो सुनाई॥  
 कहु कहु गोदाकी कुशलाई । कौन हेतु तोहिं इतैपठाई ॥  
 सखीकही तब सुंदर वानी । पहिरि मालती माल सयानी ॥  
 सोइ मालिका तुमहि पठवाई । लेहुनाथ मैंही इत ल्याई ॥  
 वचन कह्यो कछु सुन यदुराई । स्वप्नमाहँ मिलि गये पराई ॥  
 ऐसो कोउ न करत कोहु काहीं । बाँहँ पकर त्यागत प्रभुनहीं ॥

दोहा—जबते निरख्यो रूप तब, तबते कल मोहिं नाहिं ॥

तुम्हरे विरह विषाद वश, निशिदिन शोचत जाहिं १५  
 सुनहुनाथ ताकर असहाला । गोदा तुमविन बहुत विहाला ॥  
 निशिदिन तुमहिं मिलन अभिलाषै । तुमविनआशऔरनहिंराखै॥  
 चौकविरचि मोतिनकी चारू । करति मिलनहितशकुनविचारू  
 सोवति नहिं जोवति दिनराती । खोवति भोजन पान अघाती ॥  
 जो ताकर चाहहु प्रभु प्राना । तौद्रुत मिलहु बात नहिं आना ॥  
 सीता हित बांध्यो तुमसागर । हन्यो दशानन तेज उजागर ॥  
 शिशुपालादिक नृपमदमोरी । लायो रुक्मिणि करि बरजोरी ॥  
 मेरी वार गही निठुराई । काहे नाथ दया विसराई ॥  
 द्रौपदिगज गोपी मुनिनारी । राखिलियो जे तुमहिं पुकारी ॥  
 अब जो मोहि ग्रहण नहिंकरिहौ । तौ यह अयश नाथ कहँ धरिहौ॥  
 सखी वचन सुनि सुखी मुरारी । कह्यो वचन सुनु दशाहमारी ॥  
 गोदाकी जब सुधि मोहिं आवै । तबते और न कछू सोहावै ॥

दोहा—ज्यों चंकोर चंद्रहि चहै, ज्यों चातक घनश्याम ॥

त्यों गोदाहि हंम चाहते, तेहिंविन मोहिं न अराम॥१६॥  
 असकहि जो माला सखिदीन्ही । सो प्रभु पहिरि कंठमहँलीन्ही ॥  
 कह्यो वचन सुनु सखीसुजानी । प्राणराखिलिय माला आनी ॥  
 जो हम आजु माल नहिं पावत । तौ तनुते जियरो कटि जावत ॥

असकहि प्रभु मूंदरी उतारी । तैसहि कमलमाल निज प्यारी ॥  
 उभयवस्तु दीन्ह्यो सखिहाथा । बोले वचन रंगपुर नाथा ॥  
 उभयवस्तु दीन्ह्यो तेहि जाई । और दिथो अस वचन सुनाई ॥  
 कुरकानगर माहँ यहिवारा । होइ स्वयंवर अवशिहमारा ॥  
 तहँ ऐहँ मम सब अवतारा । सुरमहर्षि देवर्षि अपारा ॥  
 जुरि हैं मेरे भक्त घनेरे । तेहिं करमाल परी गर मेरे ॥  
 सुनि हरिवचन सखी सुखपाई । गोदाके समीप द्रुत आई ॥  
 दईमाल मुँदरी हरिकेरी । वचन कह्यो सब जो हरिटेरी ॥  
 गोदा सुनत प्राण इव पायो । सखीचरण पुनिपुनि शिरनायो ॥

दोहा—पांचसात बीते दिवस, विष्णुचित्त मतिवान ॥

लैदुहिता कुरकानगर, कीन्ह्यो तुरत पयान ॥ १७ ॥  
 बल्लव देव भूप तहँ केरो । चलयो संगलै सुदल घनेरो ॥  
 विष्णुचित्त कुरकापुर माहीं । पहुँचे जब लै दुहिता काहीं ॥  
 तब शठकोप स्वामि तहँ आये । औरहु सब आचार्य सिधाये ॥  
 विष्णुचित्त शठकोप बोलाई । दियो सकल वृत्तांत सुनाई ॥  
 तब शठकोप नरेश बोलायो । बल्लभदेवहि वचन सुनायो ॥  
 तुम अरु सुमति मधुर कविराजू । साजहु सकल स्वयंवर साजू ॥  
 सुनिशठकोप वचन कविभूषा । रच्यो स्वयंवर साज अनूपा ॥  
 कनकमंच बहु रचे उत्तंगा । तने वितान प्रमाण अभंगा ॥  
 फरसैं फावि रहीं अतिचारू । लागिरही तहँ विविध बजारू ॥  
 विछे जरकसी दिव्य बिछौना । चारिखंभ सोहत चहुँकोना ॥  
 तहँ महर्षि देवर्षि सिधारे । औरहु सुर मुनि सकल सुखारे ॥  
 भयो भूपमंडल अतिभारी । जगकी जन जमाति पगुधारी ॥

दोहा—यथायोग्य बैठत भये, सुर नर मुनि महिनाथ ॥

यथायोग्य परणामकिय, जोरि जोरि युगहाथ ॥ १८ ॥

आचारज निज निज निरमाने । करहिं प्रबंध गान सुखमाने ॥  
 तहँइकसत अरु आठ प्रमाना । आये दिव्य रूप भगवाना ॥  
 इक इक मंचन पर सब बैठे । गोदा छवि पयोधि महँ पैठे ॥  
 आये रंगनाथ भगवाना । उच्चमंच बैठे सविधाना ॥  
 लखिलखिहार मूरति मनहारी । सुर नर मुनि सब भये सुखारी ॥  
 तेहि औसर शठकोप सुजाना । विष्णुचित्तसों वचन बखाना ॥  
 बोलवावहु गोदा कहँ आसू । होय स्वयंवर मोद प्रकासू ॥  
 विष्णुचित्त गोदहि बोलवाये । बहुविधि भूषण वसनसजाये ॥  
 पिता कह्यो दुहितासों वानी । जापै तेरी मति हुलसानी ॥  
 ताके गल मेलहु वनमाला । आयो अबहिं स्वयंवर काला ॥  
 सखी नाम जाको अनुग्रहा । तेहि शठ कोप वचन अस कहा ॥  
 यकसै आठ विष्णु वपु जेहँ । कहहु नाम गुण तुम तिनकेहँ ॥

दोहा—तव अनुग्रहा करपकरि, गोदाको तेहिकाल ॥

हरिके वपुके नाम गुण, वर्णन लगी विशाल ॥ १९ ॥  
 इकसैआठ कृष्णवपु जेते । नामधाम गुणवर्ण्यो तेते ॥  
 अनुग्रहा कर गहि गोदाको । चलीदेखावन हरि वपु भाको ॥  
 जाके मंचनिकट चलिजावै । ताके गुण अरु रूप सुनावै ॥  
 जातजात यहि विधि मनभाई । रंगनाथ ढिग पहुँची जाई ॥  
 सबरूपनते गोदा मनमें । रंगनाथ छवि छाकी क्षणमें ॥  
 लै वनमाल रंगपति कंठा । डारयो गोदा भरिउत्कंठा ॥  
 जोहि जनन जमाति जय कीन्ही । देवन दीह दुंदुभी दीन्ही ॥  
 भई गगनते फूलन वर्षा । उपज्यो सुर नर मुनि मन हर्षा ॥  
 विष्णुदिव्य वपु निरखि अनूपा । आश्चर्यितभे सुर नर भूपा ॥  
 तेहि क्षण ब्रह्मा सभासिधारे । रंगनाथभे गरुड़ सवारै ॥  
 सूरज चंद्र चमर कर लीने । पंखा हांकत पवन प्रवीने ॥

शंभु इंद्र धारे कर सोटा । लियो कुबेर छत्र सुख मोटा ॥

दोहा—सुर किन्नर गंधर्व बहु, साजे सकल विमान ॥

कुरकानगर भयो तहां, श्रीवैकुंठ समान ॥ २० ॥

विष्णुचित्त कहँ धनि धनि कहहीं । जासु प्रभाव महासुख लहहीं ॥

विष्णुचित्त तब कह करजोरी । रंगनाथसों कह्यो बहोरी ॥

श्रीशठकोप भवन सउछाहा । करहु सुताकर नाथ विवाहा ॥

एवमस्तु कह रंग अधीशा । शठरिपु मंदिर गयो मुनीशा ॥

तहँ विवाहकी करी तयारी । सोन वदन इक जाइ उचारी ॥

तहँ देवर्षि महर्षि अपारा । अरु आचारज सकल उदारा ॥

सिगरे व्याह साज सब साजे । भवन भवन बाजे बहुबाजे ॥

रंगनाथकी सजी वराता । कोवरणै विभूति अवदाता ॥

चलीवरात वरणि नहिं जाई । दशौदिशनि वाजन धुनिछाई ॥

ब्रह्मा वेद पढ़त चलि आगे । पैठे जाइ द्वार सुख पागे ॥

विश्वकर्माहिं हरि कह्यो बुलाई । देहु अनूपम नगर बनाई ॥

विश्वकर्मा तुरंत तेहिकाला । रच्यो विकुंठ समान विशाला ॥

दोहा—सोपुर छबि केहि भांतिते, मो मुखजाइ बखानि ॥

जहँ व्याहन आवत भये, दूलह शारंगपानि ॥ २१ ॥

नचहिं नवीन अप्सरा नाना । बहु गंधर्व कराहिं गुणगाना ॥

मंद मंद तहँ चली वराता । पुरवासिन उर सुख न समाता ॥

देखहिं धाय नगर नर नारी । कोउ देखनहित चढ़ी अटारी ॥

कढ़ी वरात राजपथह्वैकै । सुर नर मुनि मोदित भे ज्वैकै ॥

आई जवै वरात दुवारा । कहि नसकै सुखवदन हजार ॥

माथे मोर पीतपट जामा । दूलह रंगनाथ छबिधामा ॥

तहँ मोतिनकी चौक पुराई । वेद पढ़ै महर्षि समुदाई ॥

बैठे रंगनाथ तहँ आई । देवसमाज सहित छबिछाई ॥

तहँ ब्रह्मा अतिशय अनुरागे । द्वार चार करवावन लागे ॥  
मणि गण देव समूह लुटावैं । सुरतरु कुसुमनकी झारिलावैं ॥  
हरिछवि छके नगर नर नारी । कोउ न लेत मन सुरति विसारी ॥

दोहा—द्वारचार जब ह्वैगयो, गैजनवास वरात ॥

पठयो भोजन पान बहु, विधि गोदाको तात ॥ २२ ॥  
जौनदेवकी रहि रुचि जैसी । विष्णुचित्त पूरण किय तैसी ॥  
आठौं सिद्धि निद्धि नव जेती । विष्णुचित्त गृह निवसीं तेती ॥  
तेतिसकोटि देव समुदाई । औरहु जन अवली जो आई ।  
ते सब खानपान सन्माना । पूरित भे पाये पकवाना ।  
विष्णुचित्त गृह तव करतारा । आइ सबनसों वचन उचारा ।  
रंगनाथकी लगन विवाहा । यहिक्षणहै अब करहु उछाहा ।  
तब शठकोप आदि मुनिराई । गैजनवास अतिहिं अतुराई ।  
रंगनाथसों विनती कीन्ह्यो । सुर समान लै प्रभु चलि दीन्ह्यो ।  
विष्णुचित्त गृह जब प्रभु आये । सनकादिक स्वस्तेन सुनाये ।  
कहि न जाइ मंडपकी शोभा । जेहि लखिसुरसमाजमन लोभा ।  
फैली मणि दीपन उजियारी । चहुँदिशिरत्न झालरैं भारी ।  
पुरटपात्र मणिजटित सोहाये । पीठि जवाहिर युगल धराये ।

दोहा—विष्णुचित्तको करकमल, कमलापति गहिलीन ॥

सुरसमाजलै मंडपहि, शुभ प्रवेशप्रभुकीन ॥ २३ ॥

तहँ ब्रह्मर्षि सुरर्षि अरु, महामहर्षि उदार ॥

पढ़ैवेद चहुँ वोर सब, करवावैं विधिचार ॥ २४ ॥

विष्णुचित्त अति आनंद छायो । प्रभुकहँ रत्न पीठ बैठायो ।  
दक्षिण दिशि गोदातहँ बैठी । मनहुँ अनंद उदधि महँ पैठी ।  
तहाँ बृहस्पति सुदिन सुनायो । विष्णुचित्त कर कुशा धरायो ।  
विष्णुचित्त कर कुश जल धरिकै । पुनि गोदाको पाणि पकरिकै ।



सदा प्रसन्न रंगपति रहहीं । मोहिं सदा अपनो जन कहहीं ॥  
विष्णुचित्त अस पढ़ि संकल्पा । प्रभुको करगहि मोद अनल्पा ॥  
गोदापाणि नाथके पानी । धरिदीन्ह्यों ढारत दृगपानी ॥  
पाणिग्रहण रंगपति कीन्ह्यों । स्वस्तिस्वस्ति अस मुख कहिदीन्ह्यों  
ताही समय गगन महि माहीं । माची दुंदुभि ध्वनि चहुँ घाहीं ॥  
मच्यो भुवन महँ जयजय कारा । सुमन वृष्टिसुर करहि अपारा ॥  
सुर नर मुनि भाषहि बहुवारा । धनि धनि विष्णुचित्त संसारा ॥  
जाके हेतु प्रत्यक्ष सोहाये । रंगनाथ व्याहन इतआये ॥

दोहा—ब्रह्मा शिव इंद्रादि सुर, प्रगट भये कलिकाल ॥

रंगनाथको देखिकै, हम सब भये निहाल ॥ २५ ॥  
रंगनाथ गोदाकर गहिकै । दियो सात भाँवरी उमहिकै ॥  
हवन कियो पुनि पावक माहीं । विष्णुचित्त कह पुनि प्रभुपार्हीं ॥  
दाइज लीजै सर्वस मेरौ । मममन नाथ करहु पद चेरौ ॥  
एवमस्तु कहि दीनदयाला । कोहवर गये जुरी जहँ बाला ॥  
कोउ पीतांबर ऐचहि नारी । कोउ प्रभुकहँ देती बहु गारी ॥  
गोदा रंगनाथ मुखमाहीं । मेलतिहै लहकौर तहाहीं ॥  
रंगनाथ गोदाके आनन । मेलहि कौर सुखी तनभानन ॥  
सो सुखइक मुख किमि कहिजाई । बार बार तिय लेहि बलाई ॥  
यहिविधि भयो नाथ कर व्याहू । गे जनवास भुवनके नाहू ॥  
भये भोर शठकोप सिधारा । कीन्ह्यो सकल देव सतकारा ॥  
रंगनाथ कहँ घरपहँ ल्यायो । विविध भांति व्यंजन बनवायो ॥  
करवायो बहुभाँति कलेवा । विविध भांति व्यंजन अरु मेवा ॥

दोहा—बनवायो पुनि विविध विधि, देवनकी जेउनार ॥

सुर मुनि सब भोजनकिये, जाको जौन अहार ॥ २६ ॥  
जब है गई देव जेउनारा । लागि गयो सुंदर दरबारा ॥



सुर मुनि मनुज महीप अपारा । बैठे सकल सजे शृंगारा ॥  
 तब शठकोप विष्णुचित दोऊ । औरहु आचारज सब कोऊ ॥  
 अनुपम भूषण वसन मँगाये । यथायोग्य सबको पहिराये ॥  
 कीन्ह्यो विविध भांति सतकारा । सकल लहे आनंद अपारा ॥  
 विष्णुचित्त कहँ सबै सराहैं । असकोउ जन जगतीतल नाहैं ॥  
 पुनि दरबार भई वरखासू । गये वराती सब जनवासू ॥  
 चौथे दिवस रंगपति आये । विधिचौथी कर चारकराये ॥  
 तेहि निशि रंगनाथ भगवाना । विष्णुचित्तके विमल मकाना ॥  
 गोदा सहित शयन प्रभुकीन्हे । हास विलास रास रस भीने ॥  
 चारिदंड निशिरहि जब बांकी । तबशठकोपादिक सुखछाकी ॥  
 आचारज हरि भवन दुवारे । प्रभुहि जगावन सकल सिधारे ॥  
 दोहा—उक्तियुक्ति बहुभांतिकी, रचि रचि छंद प्रबंधु ।

भये जगावत गायकै, पूरणकरुणासिंधु ॥ २७ ॥

रंगनाथ गोदा दोउ जागे । भवन गवन करिवो अनुरागे ॥  
 विष्णु चित्त शठकोपादिक सब । विदातयारी करतभये तब ॥  
 सुभगपालकी रत्नजालकी । आवतभे तहँ भुवनपालकी ॥  
 विष्णुचित्त दंपति बड़भागी । रंगनाथचरणन अनुरागी ॥  
 रंगनाथ अरु गोदाकाहीं । दियो चढ़ाय पालकी माहीं ॥  
 करिपरिछन आरती उतारी । कीन्ह्यो रुदन रीतिसंसारी ॥  
 विदा कियो पुनि रंगनाथको । किय प्रणाम युगजोरि हाथको ॥  
 रंगनाथ अरु गोदा प्यारी । चढ़ि पालकि जनवास सिधारी ॥  
 तहँते भे दोउ गरुड़ सवारा । छाइ रही दुंदुभी धुकारा ॥  
 शिव नंदी मराल मुखचारी । किय ऐरावति शक्र सवारी ॥  
 सिखीस्वामिकार्तिक शुभ वेशा । भो अरूढ़ पालकी जलेशा ॥  
 पुष्प विमान धनद असवारा । चढ्यो महिष यमराज उदारा ॥

दोहा—औरहु सिंगरे देवता, चढ़ि चढ़ि निज निजयान ।

रंगनाथ संग रंगपुर, कीन्हें मुदित पयान ॥ २८ ॥

सकल भक्त अनुरागी । लीन्हें छत्र चमर बड़भागी ॥  
यहिविधि चली वरात सुहावन । गोदासों बोले जगपावन ॥  
वनउपवन गिरि ग्राम सुखारी । मंजुसरित सर देखहु प्यारी ॥  
यहि थल मोर भक्त परकाला । मोहि लूटि लीन्ह्यों इक काला ॥  
दिय साधुन भोजन करि चोरी । राख्यो भवन वस्तु नहिं थोरी ॥  
यहिविधि देखरावत गोदाको । गयो रंगपुर पाति कमलाको ॥  
करिकरि रंगनाथ परणामा । गये देव सब निज निज धामा ॥  
गोदा संग रंगपातिपावन । षट्क्रतु कियो विहार सुहावन ॥  
कछुदिन महँ गोदा सुखभीनी । भई रंगपति अंगहि लीनी ॥  
गोदा अंबाको इतिहासा । मैं कीन्ह्यों संक्षेप प्रकाशा ॥  
गोदा सरिस भयो कोउ नहिं । जके हित कलिकालहु मार्ही ॥  
प्रगट प्रत्यक्ष रमा करनाहा । विष्णु चित्त वर कियो विवाहा ॥

दोहा—मनुजलखे प्रत्यक्ष सुर,भो जगरीति विवाह ।

जनि अचरज श्रोता गुणहु, हरि निज जन गुणगाह ॥

इति श्रीरामरसिकावल्यां कलियुगखंडे दशमोऽध्यायः ॥ १० ॥

### अथ श्रीरामानुजकी कथा ॥

दोहा—श्रोता श्रद्धा सहित सब, सुनहु सुमति दैकान ।

कथा प्रपन्नमृत उदाधि, मैं अब करौं बखान ॥ १ ॥

रामानुजको मुख्य चरित्रा । और अचारज कथा पवित्रा ॥  
अहै प्रपन्नमृत विस्तारा । जेहि नब्बे अध्याय उचारा ॥  
मैंसंक्षेपहि करौं बखाना । पै प्रबंध सम्बन्धन आना ॥  
एक समय विकुंठपुर मार्ही । शेष सेजपर नाथ सोहार्ही ॥

महा वोर लखि कलियुग काहीं। प्रभु विचार कीन्हो मनमार्हीं ॥  
 केहिविधि मम सन्मुखजन होहीं। ह्वेगे सिंगरे नरक बढोही ॥  
 प्रभुको चिंतत जानि अहीशा। बोल्यो वचन नाइ पद शीशा ॥  
 का चिंतत हौ प्रभुकर सोगू। कहौ जो होइ कहनके योगू ॥  
 तब नारायण वचन उचारा। सुनहु वचन मम वदन हजार ॥  
 कलिके जीव कहौं केहि भांती। मेरे पुर आवैं सब जाती ॥  
 तुमहिं विना अस कोउ न देखावै। जो मम सन्मुख जीव करावै ॥  
 ताते लेहु मही अवतारा। सब जीवन कर करहु उधारा ॥

दोहा—सुनि नारायणके वचन, कियो विनय फणिराज ॥

दीजे दोऊ विभूति मोहिं, तब ह्वै हैं सिधि काज ॥ १ ॥

एवमस्तु तब श्रीपति भाषे। अहिप अवनि आवन अभिलाषे ॥  
 दै प्रदक्षिणा प्रभुकहँ चारी। लाग्यो चरण जबै महिधारी ॥  
 तब नारायण वचन उचारे। भक्ति काज अब हाथ तुम्हारे ॥  
 करियो तस जैसो मन आवै। तुम विन को अज्ञान मिटावै ॥  
 शंख चक्र आदिक पठवाये। मनुज स्वरूप धारि जग आये ॥  
 नेसुक जीव इतै भेजवाये। औरन नहिं उपदेश बताये ॥  
 तुमहुँ मौन धरि रह्यो न ताता। जीवन उपदेश्यो यश माता ॥  
 सुनि शासन प्रभुको धरि शीशा। एवमस्तु कहि चल्यो अहीशा ॥  
 दक्षिण कावेरी सरि पावनि। भूत पुरी तहँ रही सोहावनि ॥  
 तेहि नगरी महँ अति मतिधामा। रहद्विज केशव जज्वा नामा ॥  
 संपति सकल भवन रह भूरी। कांतिमती तेहिं तिय छवि पूरी ॥  
 पुत्र रह्यो नहिं विप्र दुखारी। सुमिरत नित यदुनाथ मुरारी ॥

दोहा—ह्वै प्रसंग अहिराज प्रभु, वसे गर्भ तेहिं आय ॥

होन लगे तबते पुरी, नित नव मोद निकाय ॥ २ ॥

चैत शुक्ल पंचमि गुरुवारा। कांतिमती तहँ जन्यो कुमार ॥

केशव जज्वा पुत्र निहारी । दीन्ह्यों दान द्विजनगण भारी ॥  
 केशव जज्वाके गुरुरहेऊ । नाम शैलपूरण जग लहेऊ ॥  
 केशव जज्वा गुरुहि बोलायो । सुतको जातकर्म करवायो ॥  
 छठी भई वरहों पुनि भयऊ । नाम तासु रामानुज दयऊ ॥  
 भै पसनी पुनि छठयें मासा । बालक बढ्यो भानुसम भासा ॥  
 संस्कार किय पंच प्रकारा । जान्यो सबै शेष अवतारा ॥  
 पुनि व्रतबंध भयो कछु काला । पढ्यो चारिऊ वेदविशाला ॥  
 षोडश वर्ष वैस जब आई । दियो पिता जब व्याह कराई ॥  
 काल पाइकै पुनि कृत कामा । केशव जज्वा गे हरिधामा ॥  
 प्रेतकर्म पितुको करि दीन्ह्यों । शास्त्रन पढ़न मनोरथ कीन्ह्यों ॥  
 यादव गिरि इक रह्यो गोसाई । पूरण पंडित सुरगुरु नाई ॥

दोहा—पढ़न हेतु ताके निकट, रामानुज मतिवान ॥

लै पुस्तक करते भये, कांचीपुरी पयान ॥ ३ ॥

न्याय व्याकरण आदि सब, पढ्यो सांग सविधान ॥

पुनि वेदांत अरंभ किय, सुमिरत कृपा निधान ॥ ४ ॥

पढ़त पढ़त बीत्यों कछु काला । तहँको रह्यो जौन महिपाला ॥  
 तासु सुता रहि सुछवि विशाला । ताहि लग्यो इक ब्रह्म कराला ॥  
 राजा यतन अनेकन ओढ्यो । पैन ब्रह्मराक्षस तेहि छोंड्यो ॥  
 यादवको तहँ सुन्यो नरेशा । बड़े मंत्र शास्त्री यहि देशा ॥  
 सुता हेतु राजा बोलवायो । शिष्य सहित यादव तहँ आयो ॥  
 रामानुजहु गये सँग ताके । ध्यावत मनहि नाथ कमलाके ॥  
 यादवके ढिग सुता बोलाई । राजा विनय कियो शिरनाई ॥  
 लग्यो ब्रह्मराक्षस दुहिताको । छूटत नाहिं यतन करिथाको ॥  
 यंत्र मंत्र कर देहु छोड़ाई । तुमहिं छोंडि नहिं और उपाई ॥  
 यादव ब्रह्मराक्षसहिं देख्यो । अतिशय प्रबल ताहि मन लेख्यो ॥

पढ़ि पढ़ि मंत्र लग्यो द्विज झारन । भई न सुता विथा कछु वारन ॥  
 प्रेत बैठ तब हँसत ठठाई । यादव ओर पाउँ पसराई ॥  
 दोहा—तबहिं ब्रह्मराक्षस कह्यो, यादवसों असवैन ॥

लाखयतन द्विज तुम करो, तुमसों मोहि कछु भैन ॥५॥  
 अस अस मंत्र शास्त्रके ज्ञातन । हमउड़ायेते हैं वातन ॥  
 पूर्वजन्मकी खबरि तुम्हारी । सिगरी जानी अहै हमारी ॥  
 गोहर है तुम पूरुव जन्मा । वसे विमौट येक कहुँ वनमा ॥  
 कढेताहि मारग कोउ साधू । जिनको हरिपर प्रेम अगाधू ॥  
 निर्मल जल तहँ देखिं तलाई । भोजन रच्यो तुरंत नहाई ॥  
 करि पूजा प्रभुकी सुखदाई । भोजन कीन्ह्यों भोग लगाई ॥  
 भोजन करि पतरीसर मोटे । फेंकि दियो तेरोइ विमोटे ॥  
 साधु जबै मारग गहि लीन्हे । तबतैं कढि भोजनसोइ कीन्हे ॥  
 साधु जूठ भोजन परभाऊ । भये आय यादव द्विजराऊ ॥  
 साधु उच्छिष्ट पुण्य अतिवाढ़ी । विद्या त्वाहिं आई अतिगाढ़ी ॥  
 भयो ब्रह्मराक्षस जेहिं हेतू । सो मैं कहत सुनहु मतिकेतू ॥  
 मैं द्विज रह्यो सहित निजनारी । कीन्ह्यों यज्ञ जगत महँ भारी ॥

दोहा—भूलि गयो मोहि मंत्र तब, भयो कृपाकर लोप ॥

सोइ पापतैं मैं भयो, ब्रह्म प्रेत भरिकोप ॥ ६ ॥

जरन लग्योनिशि दिवस शरीरा । भ्रमत रह्यो भूमहँ सहिपीरा ॥  
 भ्रमत भ्रमत इक समय तहांहीं । आयो कांची नगरी मांहीं ॥  
 नृपके सुता काहँ मैं लाग्यो । तबते कछुक मोर दुखभाग्यो ॥  
 यंत्री मंत्री सबै ह जारन । करिनहिसके मोहि कछु वारन ॥  
 तुमहुँ जाहु द्विज अब घरमाहीं । हम छोंड़ब कैसेहु यहि नाहीं ॥  
 यहि छोंड़नकी एक उपाई । सो हम तुमको देत बताई ॥  
 तुम्हरे शिष्यन महँ इक अहई । मोहिं छोंडाय देहि जो चहई ॥  
 अपनो चरणोदक मोहिं देवै । अपनो शिष्य मोहिं करि लेवै ॥

नाम तासु रामानुज जानो । तुम्हरे सँग महाँ कियो पयानो॥  
यादव भयो चकित सुनि ऐसो । लै दुहिता कहँ भूपति तैसो ॥  
रामानुजके चरणन माहीं । डारि दिथो नृप दुहिता काहीं॥  
कह्यो नाथ यह रक्षि कुमारी । लग्यो ब्रह्मराक्षस यहि भारी ॥

दोहा—रामानुज स्वामी तवै, निजपद कंज पखारि ॥

दियो सुताके वदन महाँ, एक बारहीं डारि ॥ ७ ॥

सुता शीश निजपद धरि दीन्ह्यों । जाहु जाहु अस शासन कीन्ह्यों॥  
दिय अष्टाक्षर मंत्र सुनाई । तरचो प्रेत गो स्वर्ग सिधाई ॥  
यह चरित्र लखि यादव सोई । गयो लजाइ मौन भो रोई ॥  
भूपति सुतै अरोग निहारी । पूज्यो रामानुजै सुखारी ॥  
यादवहूँको किय सतकारा । यादव लौटि भवन पगुधारा ॥  
तव रामानुज अति सुखछायो । पूजा माहिँ जौन धन पायो ॥  
सिगरो यादव कहँ दैडारचो । तदपि न यादवशोचविचारचो॥  
रामानुजसों बाँध्यो वयरा । ऊपर सरल पेट महाँ कयरा ॥  
रामानुज मौसीके बेटा । आये करन भ्रातसों भेटा ॥  
नाम तासु गोविंदाचारज । सकल साधु जन कारककारज॥  
यादवके ठिग तुरत सिधाई । रामानुजहि मिले शिरनाई ॥  
पढ़त वेदांत निरखि निज भ्रातै । आपहु पढ़न लगे वेदांतै ॥

दोहा—एक समय श्रुति अर्थको, यादव करचो विरुद्ध ।

रामानुज बोलत भये, गुरु यह है नहिँ शुद्ध ॥ ८ ॥

तव यादव कह कुपित अपावन । भये तुमहिँ गुरु लगे पढ़ावन॥  
यादव कियो आँखि अरुणारी । रामानुजको दियो निकारी ॥  
रामानुज अपने घर आई । चिंतत बैठ शास्त्र समुदाई ॥  
पढ़न हेतु गुरु गृह नहिँ गयऊ । यादव महाकोप उर ठयऊ ॥  
॥ कह्यो आपने शिष्य बोलाई । रामानुज मम रिपु दुखदाई ॥



मोहिंसों पढ्यो बैर किय मोंसो । बालकसों में पाल्यो पोसो ॥  
 मेरो मत अद्वैत अखंडा । ताहि करन चाहत शतखंडा ॥  
 ताते अस सब करहु उपाई । रामानुज मारहु जेहि जाई ॥  
 हम उपाय ऐसी करि राखी । तुमसों सकल देतहैं भाखी ॥  
 चलिये मज्जन मकर प्रयागै । वेणीमहँ वोरिहैं अभागै ॥  
 शिष्य कह्यो शंका नहिं कीजै । रामानुजहि मरो गुण लीजै ॥  
 अस कहि रामनुज गृह आई । कोउ शिष्य तेहि गयो लेवाई ॥

दोहा—यादव लखि रामानुजै, कियो प्रशंसा भूरि ।

मकर माघ स्नान हित, चलहु प्रयागै दूरि ॥ ९ ॥

रामानुज जननी ढिग आई । प्राग जानि हित माँगि विदाई ॥  
 करन प्रयाग मकर स्नाना । यादवके सँग कियो पयाना ॥  
 आये जब यहि विंध पहारा । लहि एकांत गोविंद उदारा ॥  
 रामानुजको सकल बुझायो । यादव तोहि मारन लै आयो ॥  
 रहियो सावधान महँ भाई । यादवसों बचिहौ वरियाई ॥  
 यह सुनि रामानुज तेहि ठामा । बैठ रह्यो तरुतर मतिधामा ॥  
 यादव जात रह्यो कछु आगू । मिल्यो जाइ गोविंद बड़भागू ॥  
 यादव भाष्यो गोविंदकाहीं । रामानुज आयो कस नाहीं ॥  
 गोविंद कह्यो मोहिं भ्रम भयऊ । रामानुज आगे कढ़ि गयऊ ॥  
 ताते हम तुमको मिलि लीन्ह्यों । रामानुजकरखोजनकीन्ह्यों ॥  
 यादव तब शिष्यन दौरायो । रामानुजको खोज करायो ॥  
 मिल्यो न रामानुज तेहि कानन । जान्यो खाय लियो पंचानन ॥

दोहा—रामानुजको मृतक गुणि, यादव अति सुखमानि ।

गंगामज्जन मानिफल, सोये पग पटतानि ॥ १० ॥

यादव शिष्य समेत प्रयागा । मज्जनहेतु गयो छलपागा ॥  
 विजन विपिन रामानुज जाई । तरुतर बैठ्यो शंका छाई ॥



मम आगे पाछे कोउ नहीं । काहकरैं केहि विधि कहँ जाहीं  
 असविचारि बैज्यो करि ध्याना । सँकरेके सहाय भगवाना ॥  
 निजजन दुख करुणानिधि देषी । रहि न गयो उठि चले विशेषी  
 आये कमला सहित मुरारी । व्याध व्याधिनी कर वपु धारी  
 जहँ रामानुज बैठ यकंता । तहँहैकव्यो रमाकर कंता ॥  
 कमठातीर तेग कर धारे । दंपतिरामानुजहि निहारे ॥  
 रामानुज बोले अस ताते । व्याध नारियुत कहँ तुम जाते ॥  
 कह्यो व्याध रामानुज काहीं । सत्यव्रतै क्षेत्र हम जाहीं ॥  
 तुमकोहौ अकेल वन बैठे । मानहुशोक समुद्रहि पैठे ॥  
 तब रामानुज वचन उचारा । कांचीपुर महँ भवन हमारा ॥

दोहा-मकर प्रयाग नहानहित, आये तजि गृहकाहिं ॥

राह भूल बैठे इतै, साथीपावत नाहिं ॥ ११ ॥

अब नहिं मकर प्रयाग नहैहैं । मिलै सहायक तौ घरजैहैं ॥  
 व्याध कह्यो कछु ज्ञान नतेरे । क्षेत्र सत्यव्रत कांची नेरे ॥  
 चलु हम त्वहिं कांची पहुँचैहैं । बहुरि सत्यव्रत क्षेत्रहि जैहैं ॥  
 व्याधा वचन सुनत द्विजराई । चलयो व्याध सँग आनँद पाई ॥  
 कोश प्रयंत गये दोउ जवहीं । रविभे अस्त निशा भै तबहीं ॥  
 तब यक तरुतर कीन्ह्यों शयना । व्याधिनि जगी अर्द्धगै रैना ॥  
 कह पियसों मोहिं लगी पियासा । ल्यावहु जल तौ जीवनआसा ॥  
 व्याधा कह्यो कूपहै दूरी । नहिं जैहौंलागति भयभूरी ॥  
 तब रामानुज कह अस वानी । भोरभये देहँ हम पानी ॥  
 यहिविधिति नहिं भयो भिनसारा । तब व्याधा अस वचन उचारा ॥  
 रातिदेन कहि राख्यो पानी । देहु कूपते तुरतहि आनी ॥  
 तब रामानुज जलहित गुयऊ । कूपमाहिं जब पैठत भयऊ ॥

दोहा-व्याधा व्याधिनि दोउ तहँ, कूपसमीप सिधारि ॥

व्याध कह्यो द्रुत देहु जल, प्यासनमरतीनारि ॥१२॥  
 रामानुज जल अंजलि भरिकै । दियोपियाइ दुहुँन श्रम करिकै ॥  
 पुनि दूसरि अंजलि भरिलाये । सोउव्याध दंपतिहि पियाये ॥  
 पुनि तीजी अंजलि भरिनीरा । दियो पियाइ जानि अतिपीरा ॥  
 चौथी अंजलि भरनगये जब । दंपति अंतर्द्धान भये तब ॥  
 निकसि कूपते लख्यो मुनीशा । अपनो देश दृगनमें दीशा ॥  
 तब आश्चर्य गुन्यो द्विजराई । कोमोहिं देश दियो पहुँचाई ॥  
 विस्मय करत गये पुरमार्हीं । पूछ्यौ तहँके वासिनकाहीं ॥  
 देहु बताय कौन यह ग्रामा । ते सब कह कांचीअसनामा ॥  
 कांचीपुरी जानि मनमार्हीं । रामानुज वंद्यो हरिकाहीं ॥  
 पुनि अस मनमहँ कियो विचारामेरो जानि खँभार अपारा ॥  
 करुणा कर देवकी कुमारा । पहुँचायो क्षणकोशहजारा ॥

दोहा-पुनि प्रमुदित है निजभवन, गवनकियो द्विजराइ ॥

यादवको वृत्तांत सब, माताहि गये सुनाइ ॥ १३ ॥  
 पुरवासी रामानुज देखी । पुनर्जन्म लीन्ह्यो जिय लेखी ॥  
 माता रामानुजहि बोलाई । कह्यो वचन यहिभांति बुझाई ॥  
 क्षेत्र सत्यव्रत महँ मतिधामा । है इक कांची पूरण नामा ॥  
 है अनन्य नारायण दासा । जाहु पुत्र तुम ताके पासा ॥  
 मार्ग वृत्तांत सकल कहिजइयो । जो कछु कहै मानि सो लइयो ॥  
 तब रामानुज करि अतिनेहा । गवन्यो कांचीपूरण गेहा ॥  
 कांची पूरणको शिरनाई । पथहवाल सब गयो सुनाई ॥  
 कांची पूरण सुनि अस भाख्यो । प्रभु करुणाकर तोहिं जग राख्यो ॥  
 व्याध व्याधिनीको धरि वेशा । रक्ष्यो तोहिं कमला कमलेशा ॥  
 ताते तौन कूप तैं जाई । कनककुंभमहँ जल भरिल्याई ॥

वरदराजको पूजन कीजै । तासु कमलपद महुँ मन दीजै ॥  
कांचीपूरणके सुनि बैना । रामानुज आयो निज ऐना ॥  
दोहा—मातासोंवृत्तांत कहि, तासु निदेशहि पाइ ॥

कनककुंभलै कूप ढिग, जाइ तुरत जलल्याइ ॥१४॥  
वरदराजके मंदिर जाई । पूज्यो सानुराग चितलाई ॥  
यहि विधि नितप्रति पूजन करहीं।वसि कांची नगरी सुखभरहीं ॥  
उत यादव मज्जन किय प्रागा । तहां रोगवशभयोअभागा ॥  
जे गोविंदाचारज स्वामी । ध्यावत रहे सु अंतर्दामी ॥  
ते जब वेणी गये नहाना । बुड़की मारचो सहित विधाना ॥  
इकशिवलिंग ताहि मिलि गयऊ।गोविंदार्य सुखी अति भयऊ ॥  
जाय गुरुकहँ मूर्ति देखायो । गुरुकहँ धनि तैं जो प्रभु पायो ॥  
यादव गोविंद मकर प्रयंता । वसत भये ध्यावत भगवंता ॥  
यादव कांचीको चलि दीन्ह्यो । शिष्यहु सकल गमन सँगकीन्ह्यो ॥  
जब यादव कांचीकहँ आयो । गोविंदहु निज भवन सिधायो ॥  
शिवमूरतिको थापन कीन्ह्यो । हरपद पंकज निजचित दीन्ह्यो ॥  
यादवसों सब कांची वासी । रामानुजकी खबरि प्रकासी ॥  
दोहा—तब यादव मनमे डरचो, कीन्ह्यो बहुत विचार ॥

तासु सहायक भुवनपति,का किय होत हमार ॥१५॥  
अस गुणि अपनोशिष्य पठायो । रामानुजको वदुरि बोलायो ॥  
रामानुज प्रभु संत स्वभाऊ । विसरायो वैरीकर भाऊ ॥  
यादव निकट रहे पूरुब जस । रहन लगे अरु पढ़न लगे तस ॥  
रंगनगरमहँ तौने काला । जामुनभयो अचार्य विशाला ॥  
पंचशिष्य भे तासु उदारा । तिनके नामनि करौं उचारा ॥  
गोष्ठी पूरण कांची पूरण । महापूर्ण औ श्रीगिरिपूरण ॥  
पँचयो माला धर अवदाता । ये पांचों भे शिष्य सुज्ञाता ॥

रंगनाथ पूजन अधिकारा । जामुनि पायो विभव अपारा ॥  
 बैठरह्यौ जामुनि इककाला । कियो विचार सुबुद्धि विशाला ॥  
 मिले मोहिं बालक यक सुंदर । राम उपासक विद्या मंदिर ॥  
 रंगनाथ पूजन करवाऊं । घटिका इक विश्रामहि पाऊं ॥  
 अस विचारि सबशिष्य बोलाये । बालक खोजनको पठवाये ॥

दोहा—खोजत खोजत शिष्य सब, कांचीपुर महँ आइ ॥

रामानुजको लिखत भे, सकल गुणनि समुदाइ ॥ १६ ॥  
 शिष्य बहोरि रंगपुर आये । रामानुज वृत्तांत सुनाये ॥  
 सुनि जामुन रामानुज काहीं । अति आनंद पायो मनमाहीं ॥  
 रामानुज के देखन हेतू । कांचीपुरी चलयो मतिसेतू ॥  
 जब जामुन कांचीपुर आयो । वरदराज दरशन चितलायो ॥  
 वरदराज मंदिर महँ गयऊ । करि प्रणाम स्तुति निर्मयऊ ॥  
 करि स्तुति जामुनि चलि दीन्ह्यो । तहां आगमन यादव कीन्ह्यो ॥  
 लसत शिष्य मंडल चहुँ फेरो । गहे हाथ रामानुज केरो ॥  
 तब कांचीपूरन द्रुत धाई । जामुनसों सब कह्यो बुझाई ॥  
 जामुन जाको पकरे हाथा । सो रामानुजहै मुनिनाथा ॥  
 यादव यहि लैगयो प्रयागा । विंध विषिन मधि मारन लागा ॥  
 व्याधरूप करि कृष्ण बचायो । निजप्रभाव कांची पहुँचायो ॥  
 जामुन रामानुजको चीन्ह्यो । तासों संभाषण मन कीन्ह्यो ॥

दोहा—पै नहिं अवसर मिलतभो, तब सुमिरचौ भगवान ॥

हे प्रभुबालक मोहिंमिलै, ज्ञाता वेद पुरान ॥ १७ ॥  
 वैष्णव मत यह खूब चलै है । वाद विवाद जीति सब लैहै ॥  
 नास्तिकमतको खंडन करि है । मेरे उर अति आनंद भरिहै ॥  
 असकहि जामुन शिष्य समेतू । आयो रंगनगर मतिसेतू ॥  
 जबते रामानुजको देख्यो । तबते प्राण समानहि लेख्यो ॥

केहिविधि रामानुज इतआवै । श्रीवैष्णव मत जगत चलावै ॥  
 अस अभिलाषा करि मन माहीं । रंगनाथ मंदिर नितजाहीं ॥  
 शुभ स्तोत्र आलवंधारू । जामुन रच्यो वेदकर सारू ॥  
 उत रामानुज यादव नेरे । पढ़े वेदांतन शास्त्र घनेरे ॥  
 एक समय रामानुज ज्ञानी । यादवको अपनो गुरुमानी ॥  
 रहे पीठिमहँ तेल लगावत । यादव तिनको रघ्यो पढ़ावत ॥  
 यादव किय श्रुति अर्थ विरुद्धा । तब रामानुज भे अतिकुद्धा ॥  
 तात तेल सम दृगते आसू । यादव जंव गिरत भो आसू ॥

दोहा—तब यादव निजशीशको, कहउठाइ अस बात ॥

रामानुज कसरोवतो, गिरत आंसु अतितात ॥ १८ ॥  
 तब रामानुज कह अस वानी । यह श्रुति अर्थ विरुद्ध बखानी ॥  
 कपि नितंब सम नाहीं हरिनैना । पुंडरीक सब क्यों भाषेना ॥  
 तब यादव कीन्ह्यों अतिकोपा । रे शठ शिष्य वादकी चोपा ॥  
 तोहिं पढ़ावन मैं अनुराग्यो । उलटातुहीं पढ़ावन लाग्यो ॥  
 जाहु जाहु अपने घरमाहीं । हम अब तोहिं पढ़ाउब नाहीं ॥  
 रामानुज सुनि यादव बैना । आयो सुखित आपने ऐना ॥  
 कांचीपूरणके ढिग जाई । दियो सकल वृत्तांत सुनाई ॥  
 कांची पूरण कह्यो बुझाई । कीजे वरदराज सेवकाई ॥  
 कांचीपूरणके सुनिवैना । करन लग्यो पूजन सुख ऐना ॥  
 उत श्रीरंगनगर तेहिकाला । सुन्यो जामुनाचार्य हवाला ॥  
 रामानुजको यादव पापी । किय अपमान अज्ञानी थापी ॥  
 कांची पूरणके ढिग जाई । रामानुज निवसत सुखछाई ॥

दोहा—शालकूपते कनकघट, भरि ल्यावतहै नित्य ॥

रामानुज पूजन करत, वरदराजको भृत्य ॥ १९ ॥  
 सुनि वृत्तांत महासुख पाई । जामुन पूर्णाचार्य बोलाई ॥

कह्यो जाहु कांचीपुर काहीं । ल्यावहु रामानुजै इहाहीं ॥  
 पूर्णाचार्य सुनत गुरुवानी । कांचीको गवन्थो सुखमानी ॥  
 वरदराजके मंदिर आयो । प्रभुहिं आलवंदार सुनायो ॥  
 कनककुंभ जलभरे तहाँहीं । रामानुजको मंदिर माहीं ॥  
 सुनि स्तोत्र आलवंदारा । पूरणसों अस वचन उचारा ॥  
 को स्तोत्र रच्यो मनहारी । कहाँ रहहु तुम देहु उचारी ॥  
 तब पूरण अस वचन सुनाये । हमतौ रंगनगरते आये ॥  
 तुमहि लैन जामुनिपठवाये । ते ममगुरु स्तोत्र बनाये ॥  
 सुनि पूरणके वचन विधाना । चह्यो रंगपुर करन पयाना ॥  
 तब पूरण अतिशय अतुराई । कांचीपूरणके ढिगजाई ॥  
 कह्यो वचन आशय सब खोल्यो । जामुनार्य रामानुज बोल्यो ॥

दोहा—कांची पूरण सुनतभे, गुरुशासनयहि भाँति ॥

रामानुजकी किय विदा, रंगनगर तेहिं राति ॥ २० ॥  
 पूरण रामानुजै लेवाई । रंगनगर कहँ चल्यो तुराई ॥  
 रंगनाथ उत कियो विचारा । अबतरिहै सिंगरो संसारा ॥  
 यामुनार्य रामानुज दोई । सिंगरे नरक डारिहैं खोई ॥  
 करिहौं अब ऐसही उपाई । जामें भेंट होन नाहिं पाई ॥  
 अस प्रभु निशिमहँ कियो विचारा । उये भानु जब भो भिनुसारा ॥  
 रंगनाथके पूजन हेतू । गो यामुन जब नाथ निकेतू ॥  
 रंगनाथ तब बोले वानी । करु कारज मम शासन मानी ॥  
 आठ रोजके अंतर माहीं । जाहु विकुंठ रहो इतनाहीं ॥  
 सुनि यामुनाचार्य प्रभु वैना । मानत भे अखंड उर चैना ॥  
 अठयें रोज यामुनाचारज । गेविकुंठ धरि शिर गुरु पदरज ॥  
 शिष्य सकल अतिशय दुखछाये । प्लावन हित कावेरी ल्याये ॥  
 रामानुज पूरण सँग माहीं । आइ गये तेहि दिवस तहाँहीं ॥

दोहा—देखि जननकी भीर बहु, पूरण पूछो आइ ॥

कावेरीके तीरमें, केहि हित जन समुदाइ ॥ २१ ॥

शिष्य कह्यो सब सुन्यो न काना । यामुन कियो विकुंठ पयाना ॥  
गुरुको गवन परमपद सुनिकै । पूरणगिर्योधरा शिर धुनिकै ॥  
रामानुज पूरणलहि तापा । करन लगे तहँ महा विलापा ॥  
रुदन करत यामुनढिग आये । गुरुशरीरके पद शिरनाये ॥  
यामुनार्यकी अँगुरी तीना । गई सकल जन विस्मयकीना ॥  
तब रामानुज कह्यो पुकारी । सुनहु सुनहु यह बात हमारी ॥  
श्रीवैष्णव मत जगत पसारी । मैं तारिहौं जीव संसारी ॥  
सुनि रामानुज गिरा सोहाई । एक अंगुलि तुरंत उठि आई ॥  
पुनि रामानुज कह अस बानी । रचिहौं भाष्य संत सुखदानी ॥  
यतनौ सुनि पुनि वचन विशाला । उठी दुती अंगुलि ततकाला ॥  
पुनि रामानुज वचन बखाना । रच्यो पराशर विष्णुपुराना ॥  
सो पुराण वैष्णवन पढैहौं । ताकर नाम पराशर दैहौं ॥

दोहा—सो पुराण वर्णित सकल, साधन करि जगजीव ॥

पै हैं मोक्ष परोक्षगति, ब्रह्मानंदहि सीव ॥ २२ ॥

रामानुज मुख गिरा जु निसरी । फैलि गई अंगुलि तब तिसरी ॥  
यह लीला लखि मनुजन काहीं । लागत भो अचरज मनमाहीं ॥  
पुनि वैष्णव यामुनहि उठाये । विधिवत कावेरी पधराये ॥  
सब वैष्णव रामानुज काहीं । बोले वचन चलहु पुरमाहीं ॥  
रंगनाथको दर्शन कीजै । तिनको सब कैँकर्य करीजै ॥  
तब रामानुज कह्यो सकोपा । कीन्ह्यो नाथ मनोरथ लोपा ॥  
रंगनगर जैहैं हम नाहीं । कांची जैहैं यहि क्षणमाहीं ॥  
यामुनार्य दर्शन हित आये । तिनको नाथ विकुंठ पठाये ॥  
मेरे हेतु दया नहि कीन्ह्यो । आजहुकालिह रहन नहिं दीन्ह्यो ॥



निदैं रंगनाथ हैं साचे । भक्त मनोरथ पूरण काचे ॥  
ताते हम दरशन नहिं करिहैं । कांचीपुरी अवशिं पगु धरिहैं  
अस सिगरे वैष्णवन उचारचो । रामानुज कांची पगुधारयो ॥  
दोहा—कांचीपुरी सिधारिकै, क्षीर नदीमें न्हाय ॥

वरदराजको दरशकै, वसे भवनमें जाय ॥ २३ ॥  
सुखसों सोवत भयो प्रभाता । तब रामानुज मति अवदाता ॥  
कांचीपूरण सदन सिधायो । यामुन गवन परमपद गायो ॥  
गुरुयात्रा सुनि श्रीपति पद कहैं । कांचीपूरण दुखित भयो तहैं ॥  
रामानुज अतिशय अनुराग्यौ । कांचीपूरण सेवन लाग्यौ ॥  
रामानुज एक दिन कर जोरी । कह्यो गुरु सुनु विनती मोरी ॥  
एक दिन मोघर भोजन कीजै । दै परसादी पूत करीजै ॥  
कांचीपूरण कह्यो सुवैना । भोजन करिहैं चलि तुव ऐना ॥  
रामानुज अपने घर आयो । विविध भांति व्यंजन बनवायो ॥  
और मार्ग है गयो लेवावन । तहैं कांचीपूरण अति पावना ॥  
और पंथ है तेहि घर आयो । तासु प्रिया कहैं वचन सुनायो  
मोहिं क्षुधा अतिशय अब लागी । भोजन देहु तुरत बड़भागी ॥  
रामानुज तिय भोजन दीन्ह्यो । कांचीपूरण भोजन कीन्ह्यो ॥  
दोहा—कांचीपूरण धोइ कर, फेंकि पातरी पूरि ॥

वरदराज मंदिर गये, सेवन हित रति भूरि ॥ २४ ॥  
रामानुज कांचीपूरण गृह । जात भये देख्यो नहिं तिन कह  
आये निज आलै दुख मोई । तबलों तिय किय द्वितिय रसोई ॥  
रामानुज पूंछ्यो निज नारी । सो वृतांत गै सकल उचारी ॥  
रामानुज तब भोजन कीन्ह्यो । द्रुत हरिमंदिरको चलि दीन्ह्यो ॥  
तहैं कांचीपूरण ढिग जाई । विनय कियो चरणन शिरनाई ॥  
मोहि समाश्रै करहु विज्ञानी । भव निधि तरण उपाइ न आनी ॥

तब कांचीपूरण कह बाता । प्रभुसों पूंछि लेहुँ मैं ताता ॥  
 विन पूंछे तोहिं शिष्य न करिहौं । जस प्रभुकी आज्ञा अनुसरिहौं ॥  
 अस कहि कांचीपूरण स्वामी । ध्यावत मनमहँ अंतर्यामी ॥  
 वरदराज भगवान समीपा । गो कांची पूरण कुलदीपा ॥  
 हरिके विजन चलावन लागा । विनय कियो उमगत अनुरागा ॥  
 शिष्य होन रामानुज चाहैं । जस प्रभु आज्ञा तस निरवाहैं ॥  
 दोहा—कांचीपूरण वचन सुनि, वरदराज भगवान ॥

कह्यो वचन षट वस्तु तुम, तासों कह्यो बखान ॥ २५ ॥  
 हमहीं परम तत्त्व जगकारन । जिय अरु ईश भेद साधारन ॥  
 सब विधि गहव मोरि शरणाई । यही मुख्य है मोक्ष उपाई ॥  
 मरत जो नहिं सुमिरै जन मोहीं । तौ हमहीं सुधि करते छोही ॥  
 जो अनन्य है मेरो दासा । तेहि मैं देहुँ परम पद वासा ॥  
 रामानुज करि अति अतुराई । होइ शिष्य पूरणको जाई ॥  
 कांचीपूरण ये षट बाता । रामानुजहि कह्यो विख्याता ॥  
 तब कांचीपूरण द्रुत आई । रामानुजको गये सुनाई ॥  
 रामानुज हरि शासन पायो । रंगनगरको तुरत सिधायो ॥  
 इते रंगपुरमहँ तेहिं काला । श्रीवैष्णव सब रहे विहाला ॥  
 यामुन विरह सह्यौ नहिं जाई । कहैं कौन अब ज्ञान बताई ॥  
 महापूरण आदिक सब साधू । शोकित यामुन विरह अगाधू ॥  
 सकल संत संमत तब कीना । होइ अचारज कौन प्रवीना ॥

दोहा—वैष्णव मतको जगतमें, पाषंडिन मत खंडि ॥

कोउ दंड मंडित करै, कौन अखंड अडंडि ॥ २६ ॥  
 सब संतन मिलि कियो विचारा । है रामानुज यही प्रकारा ॥  
 रंगनगर रामानुज आवै । तौ वैष्णव मत सकल चलावै ॥  
 सकल संत संमत अस करिकै । पूरणसों बोले मुद भरिकै ॥

कांचीपुरी जाहु तुम स्वामी । दरशन किन्ह्यो वरद खगगामी ॥  
 रामानुजको निकट बोलाई । लिन्ह्यो आपनो शिष्य बनाई ॥  
 संसकार पांचौ तेहि करिकै । ल्यावहु रंगनगर सुखभरिकै ॥  
 पूरण सुनि सब संतन वानी । कांची चल्यो महा मुद मानी ॥  
 उतते रामानुज हू आयो । इतते पूरण आर्य सिधायो ॥  
 कांची रंगनगर बिचमाहीं । अग्रहार यक ग्राम तहाहीं ॥  
 तहँ भै भेंट दुहुँनसों जवहीं । माने सिद्ध मनोरथ तवहीं ॥  
 रामानुज पूरण पदमाहीं । गिरचो प्रेमवश कह कछु नाहीं ॥  
 पुनि धीरज धरि कह अस बाता । कहँ पगु धारव पूरण ताता ॥  
 दोहा—रामानुजके वचन सुनि, पूर्णोचार्य सुजान ॥

निज आगम कारण सकल, तासोंकियो बखान ॥२७॥  
 कह रामानुज बुद्धिविशाला । कीजै शिष्य मोहिं यहि काला ॥  
 पूर्णोचार्य कह्यो तब ताको । क्षेत्र सत्यव्रत चलहु तहांको ॥  
 तहँ हम तुम्हें समाश्रित करिहैं । दीक्षाविधि सिगरी अनुसरिहैं ॥  
 तब रामानुज गिरा सुनाई । नाथ अर्चित्य काल कठिनाई ॥  
 हम तुम यामुन दरशन हेतू । आये रंगनगर मतिसेतू ॥  
 तेहि दिन यामुन परगति पाई । दरशन आश न मिटी मिटाई ॥  
 नहिं कछु काल केर विश्वासा । केहि क्षण जीवन केहि क्षण नासा ॥  
 ताते अबहिं समाश्रित कीजै । और कछु शासन नहिं दीजै ॥  
 जहँ गुरु मिलै शिष्य तहँ होवै । देश कालको कछु नहिं जोवै ॥  
 सकल शास्त्रसिद्धांत यही है । शिष्य होइ गुरु मिलै जहीहै ॥  
 प्रीति अलौकिक पूरण देखी । संतशिरोमणि तेहि जिय लेखी ॥  
 राम धाम यक रह्यो तहाँही । रामानुजको लै संगमाहीं ॥

दोहा—पूरणार्य तहँ जाइकै, दीक्षाविधि सब कीन ॥

रामानुज भुज मूलमें, शङ्ख चक्र धरि दीन ॥ २८ ॥

ऊर्ध्व पुंड्र पुनि दियो ललाटा । जाहि लखत विसरत यम वाटा ॥  
 लक्ष्मणार्य अस नाम धरायो । अष्टाक्षर तेहि मंत्र सुनायो ॥  
 पुनि विधि सहित हवन तहँ कीन्ह्यो । पांचहु संस्कार करि दीन्ह्यो ।  
 वरदराज पूजन अधिकारा । रामानुजको दियो उदारा ॥  
 रामानुजको संग लेवाई । पूरणार्य कांचीपुर जाई ॥  
 वरदराज लखि लह्यो हुलासा । रामानुज निवास किय वासा ॥  
 पूरणार्य रामानुज बोली । कहत भये मन आशय खोली ॥  
 यामुनार्यके यात्रा पाछे । तुम वैष्णव मत थापहु आछे ॥  
 सब वैष्णवन माहँ मति धामा । अहै चक्रवर्ती तुव नामा ॥  
 सुनि रामानुज गुरुकी वानी । कियो प्रणाम जन्म धनि जानी ॥  
 पुनि गुरुसों बहु शास्त्र पुराना । पढ़्यो अंग क्रमसहित विधाना ॥  
 पाखंडिनके मत बहु खंडे । श्रीवैष्णव मत महि महँ मंडे ॥

दोहा—कांचीनगरी महँ रही, तेजी संतसमाज ॥

तिन सबको सत्कार किय, रामानुज द्विजराज ॥२९॥  
 कांचीनगरी महँ गुरुपासा । कीन्ह्यो वास सुखित षट्मासा  
 एकदिवस अपने गृह पाहीं । तेललगावत अंगानि माहीं ॥  
 तहँ इक कोउ भिक्षुक द्विजआयो । तेहिं लखि करुणा रसउरछायो  
 निजनारीको कह्यो बोलाई । देहु अन्न याको कछुलयाई ॥  
 नारी कह्यो कछू घर नाही । अन्नहेतु दूँढन कहँ जाहीं ॥  
 तब स्वामी अमर्ष करि भारी । आपहि दूँढन चले सुखारी ॥  
 अपने घरमें दूँढन लागे । पायो अन्न कछू सुख पागे ॥  
 लै ओदन तियको देखरायो । कह्यो मूर्खिनी कहँते आयो ॥  
 तैं दुष्टा नहिं करसि विचारा । करतिअतिथिकोअतिअपकारा  
 तब सभीतिरामानुज नारी । बैठरही घर कछु न उचारी ॥  
 एकसमय पुनि तेहि पुर माहीं । जहँ जलभरन सकल त्रियजाहीं